

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opvscvla Spiritvalia - I. Horologium Asceticum. II. Principia Vitae
Christianae. III. Manuductio ad Coelum. IV. Via Compendii ad Deum. V. De
Sacrificio Missae. VI. De Discretione Spirituum ... Operum Eminentiss.
Cardinalis, Tom. I

Bona, Giovanni

Parisiis, 1677

Manuductio Ad Caelvm.

urn:nbn:de:hbz:466:1-9969

MANUDUCTIO AD CŒLUM

Medullam continens Sanctorum Patrum,
& veterum Philosophorum.

Trii

MANUNDICTIONE
AD CÆLUM

Debutum est corpus Christi in Sion
in die Pentecostes anno 1588.

PRÆFATIO
AD
LECTOREM.

Duos sunt, quæ in vestibulo hujus libelli me tecum præfari oportet, Lector Benevole. Nam primitus vereor, ne me aliqui impudentia & temeritatis accusent. Quomodo enim, inquiet, ad cœlum homines manuducere præsumis ipse prorsus terre affixus? Aut quâ fiduciâ describere virtutem aggredieris, cui præstans idoneus non es? Deinde quid novi hâc tuâ nobis lucubratione profers? Rem antiquam ab innumeris penè Scriptoribus docte & eleganter pertractatam fastidiosâ & rudi repetitione recantas: opesque alienas tanquam tuam verbo mendaci ostendas.

Hæ sunt voces, quibus convellere studium meum nonnulli forsitan conabuntur. Sed primum me excusabo Prudentis illius dicto, quia

— Fungor vice cotis, acutum
Reddere quæ ferrum valet exors ipsa secandi.

Et ut alterius Sapientis verba usurpem: Non sum tam improbus, ut curationes æger obeam, sed tanquam in eodem valetudinario jaceam, de communi malo tecum colloquor; remedia communico. Sic itaque me audi, tanquam in eum loquar: in secretum te meum admitto. Discentem discipulum, & meipsum erudientem non docentem magistrum hic me profiteor: nam mutuo ista fiunt & dum docent homines, discunt.

T iiiij

P RÆFATI O A D L E CTOREM.

Quod autem secundo loco objectum est, non aliter diluere possum, quam ingenuè fatendo pauca hic de meo, pleraque aliena esse. Congessi huc plurima, vel quæ propriâ didici experientiâ, vel quæ mihi profutura intellexi, dum Sanctorum Patrum, & veterum Philosophorum scripta percurserem. Sed apum more varia libamenta in unum saporem confudi, quædam admiscens propriis auctorum verbis, quædam meo stylo, quem facilem esse volui & sine fuso; quia facere hic doceo, non dicere. Habet hic igitur omnium moralium institutionum, quas ad benè beateque vivendum Sancti Patres tradiderunt, compendium quoddam & breviarium: habet Senecæ, Epicteti, Antonini, aliorumque Sapientum placita meliora. Placuit autem salutares admonitiones, quas efficaces esse in meis malis expertus sum, omissâ locorum citatione è quibus eruuntur, breviter indicare; remedia enim hæc animæ sunt, non ingenii lenocinia: nec delectare hic intendo, sed prodeesse: Non querit ager, quis potionem miscuerit; vel unde pharmaca accepta sint, dummodo sanent. Multa omisi, quæ dicere poteram; multa, quæ subtilius explicare. Magis enim prodest pauca præcepta sapientiæ tenere, quæ in promptu semper & usu sint, quam multa discere & illa ad manum non habere. Multum didicit, qui scit quantum saluti satis est. Faxit Deus, ut hic meus qualiscumque labor omnibus primum prosit; sed mihi præcipue, ne dicta mea factis deficientibus erubescant.

MANUDUCTIO AD CÆLUM

Medullam continens Sanctorum Patrum,
& veterum Philosophorum.

C A P U T I. *De Fine ultimo hominis. Quām malum sit
ab eo deficiere. Quibus mediis, & quo ordine
ad ipsum perveniat.*

1.  D Cælum te manuducere propositum mihi est, quicumque hæc legis, ad illud scilicet bonum, quo adepto, nihil possis ulterius desiderare. Hic est scopus, hæc meta, ad quam omnium vota naturali propensione suspirant. Omnes beati esse volunt, sed ob culpam primi parentis plerique obsecinati, relicto vero & summo bono, ad falsa & fucata quærenda se inutiliter applicaverunt. Et hi quidem summum bonum existimantes nullâ re indigere, divitiis hoc nomen imponunt. Alii sumnum bonum in summa potentia constituentes, vel regnare ipsi volunt, vel regnibus adhærere. Quidam verò usque ad sordida descendentes, felicissimum putant voluptatibus diffluere, qui summi boni possessionem carne & gulâ metiuntur. Tanta apud istos beatitudinis vilitas est. Sic laborantes sine fructu, ac veluti errantes in labyrintho, quò velocius ad bonum properant, ed longius abscedunt: ideo infelices, quia suam non agnoscunt infelicitatem.

2. Hæc res est, quæ magnis te malis involvit, miserabilis homo, quod beatè quidem vivere, & beatè mori desideras; sed ad videndum quid sit beatitudo & quomodo ad eam perveniat, stultus & cœcus es devio errore

per varios anfractus incedens. Quicquid agis, quicquid cupis, quicquid moliris contra te est. Non enim respicias illud bonum immensum, in quo sistere debet voluntas tua, quia ultra summum non est locus: sed vagaris sine proposito, instar formicarum per arbusta repentium, que in summum cacumen, deinde in imum inanes aguntur. Deus omnium conditor è nihilo te creavit, ut ipsum solum ames; ipsi soli servias totâ mente, toto affectu. Sicut necessarium est illum esse, ita & esse ultimum finem. Serio cogita quantam tuę vitę partem illi tribuas, cui te totum impendere debes. Errant studia & consilia tua, si ad ipsum non diriguntur. Sicut finis viæ tuæ locus est, quo tendis, quo cùm perveneris, quiesces: sic finis vitę tuæ Deus est, ad quem referre debes quicquid cogitas, quicquid loqueris, quicquid agis; donec ipso adepto omnia vota compleantur. Ad eternum dicit interitum, quicquid ab ultimo fine abducit.

3. Quemadmodum in navigatione subducto navigio si aquatum exieris, obiter in littore aut cochleam colliges, aut bulbum; animo autem in navim semper intento sollicitus eris, ne gubernator vocet; ac tunc relictis omnibus ad navim properabis: sic tibi in vita agendum est. Mente semper in Deum fixa, ita rebus externis utere, ut cordi minimè inhærent, nec te à proposito fine dimoveant. Serviunt illæ tibi, ut tu servias Deo. Alioquin à divina deficiens unitate ad plura non necessaria dispergeris; totque colis idola quot sunt creaturæ, quas inordinato affectu prosequeris. Hi sunt Dii tui, quibus non bovem, non hircum sed te ipsum, tuamque salutem turpi sacrilegio immolas. Non patitur lex amoris quidpiam cum Deo amari, nisi in Deo & propter Deum. Summa perditio est à summo bono deflectere & converti ad creaturem.

4. Quod Princeps Medicorum de imphris corporibus ait; quo magis alantur, eo amplius laedi; id etiam de animalibus dicendum est. Nam qui à prava consuetudine ad meliorem statum transfire incipiunt, malæ vitæ venenum

prius evomere debent, ac tum animo expurgato solida virtutum percipere alimenta. Ipsa autem purgatio sic perficienda est, ut quotquot admisisti peccata expientur, tum omnis erga illa affectus exuatur: vitiosi habitus eradcentur: malæ propensiones & appetitus immoderati sub rationis imperio coercentur: caro castigetur: quæ corpori sunt necessaria ad justum moderamen redigantur, frænum linguæ ac sensibus imponatur: quæcumque ad arcem virtutis properanti moram injicere possunt penitus exterminentur. *Quid* trepidas, viamque tibi ad beatitudinem difficultem fingis? Tu te ipsum facere beatum potes, eo vires suppeditante, qui principium tuum & finis est. A te autem debes exire, ut ad eum pervenias. Eò vicinior illi fies, quo à te ipso remotior fueris.

5. Proponendum est itaque primè quid appetas, quo properes: tum via circumspicienda, quâ summum illud bonum adipiscaris, intellecturus in ipso itinere quantum quotidiè proficias. Perlustra sedulò conscientiam tuam, & caligantes oculos aperiens solerter adverte qualis debeat esse, dum alius fieri potes. Serò fraudem agnosces, cùm vitare nequibis. Disce quo remedio cupiditatum mansuetat infania, quo fræno timorum saevitia compensatur. Disce terrena despicere & ab his sponte discede, quæ diu tecum esse non possunt. Omnia relinque, antequam relinquareis; ut cum venerit mors nihil in te reperiatur, quod possit abolere. Curam autem præcipuam animæ impende, ut quæ excellentiâ prior est, non sit cultu posterior. *Quid prodest homini si universum mundum lucretur, animæ vero suæ detrimentum patiatur?* Nullum est lucrum ubi salutis est damnum.

CAP. II. *Cupienti benè vivere morum instructor eligendus est. Qualis hic esse debeat. Officia discipuli.*

1. **N**ihil magis necessarium incipienti servire Deo, quam ut se regi & institui ab optimo præceptore finat. *Quis enim iter ignotum sine duce aggrediatur?*

Quis difficillimam artem ediscat sine magistro? Paucos numerabis, qui seipso protulerint, qui sine ullius adiutorio ad virtutem exierint. Quid universim fieri oporteat & mandari, absentibus potest & posteris scribi. Quando autem & quemadmodum quidpiam fieri debeat ex longinquo nemo suadebit: cum rebus ipsis deliberandum est. Non potest Medicus per epistolam cibi aut pharmaci tempus praescribere, vena tangenda est. Ita etiam in curandis animi morbis quædam sunt, quæ non nisi à præsente monstrantur. Paulus futurus Doctor gentium, postquam conversus à Christo fuit, missus est ad Ananiam, ut ab eo disceret viam vitae. Durum & laboriosum negotium aggressus es, malignitatem naturæ vincere, cum spiritualibus nequitiis colluctari, & ad virtutem te ipsum perducere inter tot obstantia & impedientia. Quare aliquem invocare oportet, qui manum porrigat adjutricem, qui ostendat pericula, insidias detegat & in ancipiti pugna instruat ad victoriam. Sed dicas mihi: quem invocabo? Virum fidelem & sapientem, qui velit & possit tibi prodeesse: cuius reverearis occursum, non reformides: qui non castiget errantem, sed emendet: cuius vita plus oculis quam auribus probetur. Malè imperat, qui præcipit & non facit.

2. Eum elige adjutorem, qui nemini aduletur, qui se vulgi congressibus non inferat, qui nec divitum convivia, nec Principum ædes frequenter, qui tale aliquid habeat in vita, quale Argentarius in pecunia, qui possit dicere affer quamvis drachmam, ego eam discernam; affer quamvis affectionem, ego eam dijudicabo: qui tanquam probatus medicus internas ægritudines dignoscat, qui apta praescribat remedia ad omnes animi morbos depellendos. Talis sit, qui subtili examine omnium spirituum instinctus discernere, inter virtutes & vitia discrimen ponere, omnium moribus servire sciat: qui omnes recessus & secreta mentis tuæ solerti consideratione perscrutetur: qui ab omni vitioso affectu immunis lucro dumtaxat spiri-

tuali intentus sit : qui in spiritu lenitatis errantem doceat & alliciat : qui omnes diaboli versutias & stratagemata detegere & eludere didicerit : cui denique non erubescas omnia mala tua pandere , omnia pectoris penetralia rese- rare. Pars magna felicitatis tuæ erit talem posse reperire.

3. Cum eo libenter sermonem habeas , quicquid prava propensionis , quicquid morbosæ qualitatis in te est , quicquid delinquis , quicquid etiam boni facis , quicquid cœlitus immissum tibi existimas , prudenti ejus discussioni committe. Sæpè illum deprecare , ut si quem tibi notaverit turbulentum inhærere affectum , indicare ne gravetur , idque frequenter faciat , nec redarguendi verecundiâ impeditus vitia tua dissimulet. Quod si negaverit se aliquid in te deprehendere censura dignum , ne te protinus credas inculpabilem evasisse. Tacet enim aut timens odium tuum , aut desperans emendationem. Tunc verò urge & insta vehementius & factis ostende quantum proficere cupias. Incipe vitia apud illum deponere , ad ejus præscriptum mores exigere. Gaude fieri ab eo convitum tuæ pravitati , semperque ab ipso vel sanior redeas , vel sanabilior. Inter tot mala aliquid est velle sanari.

4. Hæc sunt docentis & discentis mutua officia , ut ille prodeesse velit , hic proficere. Ne ille profit vix quidpiam impedit , nisi discipuli refractarium ingenium , doctrinæ impatiens & curationis incapax. Quidam enim innixi prudentiæ suæ alterius sequi ductum detrectant. Hæc omnia inquiunt , quæ tu doces , jam scio. Quid prodest aperta monstrare ? plurimum. Interdum enim scis & non atten-dis. Non docet admonitio , sed excitat memoriam , nec patitur elabi. Sæpe animus etiam aperta dissimulat : inge-renda itaque illi rerum notissimarum notitia. Nam virtus erigitur cum tacta est & impulsa. Alios retrahit malus pudor , vitium puerile & viro indignum. Alii quasi phrenetici pertinaci silentio mala intus premunt & Medico curationi intento indignantur. Suadet nimirum hanc noxiā taciturnitatem tartareus hostis sperans perniciem

afferre quamdiu latet. Et corporis quidem ulcerata metu
pudibunda omnium oculis exponere, ut carentur, non e-
rubesca; animæ verò carcinomata studiosè tegis, ac si ea
celare tollere sit; cum vix tamen fieri possit, quin vel te
repugnante ipsa se prodant. Qui vulnus tegit, nunquam
sanabitur.

5. Nunquid Medicus injuriam tibi facit, si tuum tibi
morbum demonstrat, si periclitanti dicit, Malè habes,
febricitas: hodie tibi abstinentia à cibo est, hodie aqua
potanda? Imò pro beneficio laudatur, gratiæ ei aguntur
& referuntur. Si quis autem dixerit, appetitiones tuæ
æstuant, opiniones vanæ sunt, affectus immoderati; pro-
tinus exclamas, ô facinus ferro & sanguine vindicandum!
ô contumeliam nullo modo ferendam! Infelix! Quid tibi
damni aut mali infert tuæ salutis studiosus monitor & in-
structor? Id scilicet quod speculum deformi. Te talem ti-
bi ostendit, qualis es. Corrige ergo quod ille arguit; com-
pone mores, ablue frides. Facile potes, si volueris, om-
nium te oculis irreprehensibilem exhibere.

C A P. III. *De purgatione à peccatis. Exuendus erga illæ
affectus & vitia extirpanda. Nullum efficacius vitiorum
remedium, quam mortis & aeternitatis consideratio.*

I. **A**B ultimo fine deviat homo, cùm peccatum com-
mittit, quod est omnium malorum causa. Ab hoc
semine nascitur quicquid cruciat: hoc veneno totus orbis
inficietur. Latet illud dum fit, sed cùm patratum fuerit,
tunc intelliges quam malum sit. Fuere qui mortuorum
corpora vivis jungerent, ut fœtore torquerentur. Similis
est in peccantes animadversio, alligatum est eis suppli-
cium, non inveniunt quo evadant. Nisi aliquid patiaris
ne malum facias, plurimum patieris quia fecisti. Vix
concipitur prava actio & jam puerpera est suæ pœnæ. In-
de nata mors est, hinc succensa gehenna. Ab omnibus
itaque flagitiis expianda conscientia, dolore, confessione
& satisfactione. Nec graviora, dumtaxat evitanda, sed

minima quæque & leviora , que tametsi mortem non affe-
rant , vires tamen sensim dissolvunt & ad mortiferam la-
bem disponunt. Quid autem interest ad naufragium,
utrum navis uno fluctu operiatur ; an guttatum subrepens
aqua & per incuriam spreta ipsam impletat & submerget ?
Tantò majorem maculam ista inferunt moribus , quanto
facilius poterant evitari. Quò hostis debilior est , eò gra-
vior tibi ignominia erit , si ab illo vincaris.

2. Nunquam virtutes animo infondere poteris & te in
pristinum libertatis statum asserere , nisi exuas omnem
affectum erga peccata quamvis minima ; ne corpore in
deserto , animo sis in Ægypto. Malè tecum agitur , si
post dimissam injuriam , post relictos turpes amores ; ad-
huc malignis collocutionibus præstas auditum , adhuc
terrenâ specie delectaris. Vitia autem & pravi habitus ,
qui deletâ culpâ in te remanent tanquam pessima peccati
soboles radicitus extirpari debent. Si solos ramos præci-
deris , servata radix emerget & novi ex ea succrescent ra-
musculi iniquitatis. Dicis te velle vitia excindere. Falsum
est , non enim claudis vitiis ostium , sed opponis. Dicis te
offendi turpitudine vitæ tuæ. Hoc credo , quis enim non
offenditur ? Homines mali vitia sua oderunt simul &
amant , atque etiam , dum perpetrant , detestantur. Quid
prodest verbis mala rejicere , factis amplecti ? Nemo est
tam profligatæ conscientiæ , cui aliquando vitia sua nau-
seam non faciant , sed citò cum illis in gratiam redeunt.
Qui autem verè conversus ad Deum est , ponit securim
ad radicem & ipsas minutissimas vitiorum fibras eradicat.
Tum memor fragilitatis suæ omnes peccandi occasionses
studiosissimè vitat : & ad quodlibet malæ rei objectum ti-
more concussus reslit & exhorrescit.

3. Quid frustra tergiversaris & præcipienti Deo vitio-
rum exterminationem opposis naturæ infirmitatem ? Ne-
mo magis virium tuarum mensuram novit , quam qui ip-
sas largitus est. Quare ergo non statim obtemperas , cum
non commodum queratur jubentis , sed tua utilitas ? O

cœcam & sceleratam temeritatem! Servili nequitia in os Domini reclamare audes & dicere durum esse quod ille jubet; ac si mandata tibi imposuerit, quæ ferre non possis: ut videatur præcipiendo non tam salutem tuam quæsivisse, quam pœnam. Hæc est nimurum humana perversitas & malè de Deo mereri & labore sibi fingere in præcepto. Sed si volueris vires tuas experiri, videbis multò plura tē posse, quam putabas. Non quia difficultis est lacta non audes; sed quia non audes, difficultis illa videtur. Multa prius terrori habita usus vertit in risum. Incipe, nec te ipsum contemnas. Non deserit Deus milites suos. Tantum virium habebis, quantum volueris.

4. Omnia vitia facilè vinces, si omnem tibi diem supremum diluxisse credideris. Quid est quod te alligat terræ? Quia nunquam cogitas cito ab ea exeundum esse. Transiunt quotidiè præter oculos tuos elata cadavera, quæ mortalitatis oblitum respicere cogunt ad mortem. Tu autem in media strage morientium nihil minus quam mortem cogitas: & cum nihil frequentius videoas, nihil citius oblivisceris. Veniet tamen qui te relevet dies, & ex contubernio olidi ventris educat. Discutietur ista caligo & tunc in tenebris te vixisse cognosces, cum lucem aspexeris. Produc, si potes, ex tot elapsis annis vel unicum diem integræ virtutis testem, qui non fuerit aliquâ labe pollutus. Defloruit rudior ætas inter talos & nuces, inter ineptias & libidines adolescentia, inter scelera & flagitia præceps juventus. Post omnes annos, qui à cunis ad canos defluxerunt, nihil jam superest nisi dolor & pravi fructus iniquitatis. Heu quales te apprehendent angustiae, cum præterita pudori erunt, formidini futura? Quid tunc proderunt divitiae tot partæ sudoribus, tot curis quaesitæ? Quid carnis delitiae & probrosæ voluptates; quid inania dignitatum nomina, quid purpura, quid coronæ? O si daretur reverti ad crepundia & telam de novo exordiri, quam meliori textu omnia concinnares; sed intempestiva illo fatali momento hæc vota erunt. Si vis tempore uti nunc

nunc incipe: & ea desere, quæ tunc velles deseruisse,
Minima res est momentaneis renunciare, ut eterna con-
sequaris.

5. Quære, si lubet, ex morituro de anteacta vita quid sentiat. Vix unum reperies, qui non longè diversam proferat de opibus, dignitatibus, mundique vanitatibus sententiam, quam vivens habuerit. Tunc res omnes æquiori lance pensantur, suisque momentis æstimantur. Et illis quidem sera sapientia in exitu est: tibi verò plurimū proderit, si ex alieno errore tuum corrigerem didiceris. Potes nunc tutò navigare, quid expectas tempestatem? Potes te rebus integris subducere calamitati: cur te reservas extremo periculo? Sera, dum mergeris, cautio est; sera prudentia, cum jam peristi. Tot maximi & sanctissimi viri, relictis omnibus impedimentis, cum sibi & mundo valedixissent, hoc unum in extremam usque ætatem egerunt, ut vivere, & mori scirent: plures tamen nondum se scire professi, è vita abierunt: Adeò difficile est hanc artem ediscere. Tu autem in senectutem sanadiffers consilia, & inde vitam vis inchoare, quò pauci perduxerunt? Stultitia magna est tunc vivere incipere, cum desinendum est.

6. Quò te projicis incautus homo? sic credis & sic vi-
vis? umbræ transitus est tempus tuum, punctum vita
tua, & si quid minus puncto esse potest. Vix natus
desinis esse. Siste vel unum diem, horam dumtaxat
ne fluat inhibe, brevem moram temporis pone. Fru-
stra conaris: nam te secum citius abripiet, quām ut
desinat velocissimè fluere in tuum rerumque omnium
exitium. Et huic momento æternitatem postponis, quæ
finem non habet. O stultitiam! ô cæcitatem! Corpori pe-
rituro non cessas quæ ad ipsum pertinent comparare, &
non est finis acquisitionis tuae: animæ verò, quæ nun-
quam moritur, nulla provides bona in futurum, ac si tua
non foret? languet corpus, omne discrimin subire para-
tus es, ut sanetur: Languet anima & negligis & non sen-
tis? Quando dictum est tibi, Naviga ne moriaris & distu-

C. Bona Opusc. Spirit.

V

listi? sume amarissimum pharmacum & recusasti? Levia Deus jubet ut vivas in æternum & non vis obedire? Si tibi lis foret, omnis cogitatio tua, omnis sermocinatio circa illam occuparetur, nec subsidia parare cessares, ut pro te Judices sententiam ferrent: extremo autem judicio imminentे, è quo pendet æternitas, ridēs, nugaris, peccas in æternum peritus. Ah define tandem insanire, & à vitiis emergens sic forma quotidiè animum tamquam ad extreum ventum sit. Vera philosophia hæc est, quām maximè fieri potest hanc animam è corpore educere & separare.

7. Hoc sit negotium tuum, hoc otium; hic labor, hæc quies, subducere te tempori & immergere æternitati. Fixum semper & immobile stat, quod in jura transit æternitatis. Avarus epulo aquæ stillam post tot sæcula adhuc petit & perpetuo mugitu frustra rogabit. Æternitas est duratio semper præfens, nunquam sine suspirio & horrore nominanda: est rota quæ semper volvit: est juge, interminatum, semperque inchoans principium. Seria ejus cogitatio mundi delitiis miscet absynthia; lethalique mœrore attonitos homines, ac veluti sideratos dejicit, hæc animam rebellem domat & curis inanibus indormiscentem excitat ad virtutem: hæc famem, & sitim condit, hæc omnem laborem facilem, jucundum omnem dolorem, omnem pœnam suavem, & brevem esse persuadet. Impleantur numericis notis ingentia cœli spatia quaunque in immensum protenduntur. Quis præter Deum poterit hanc propemodum infinitam numerorum seriem exprimere? Hi tamen numeri innumerabiles nec initium quidem æternitatis sunt. Tot anni, tot sæcula labantur, quot sunt in illis unitates, nondum aliquid de æternitate decepsit. Nondum pervenerunt ad desperatissimæ æternitatis initium infelicissimi mortales, qui perpetuo inferni incendio cruciantur. Ad hanc considerationem si non horrescis, si vitam serio non emendas, quovis saxo durior es.

CAP. IV. *De Gula. Ejus mala, & remedia. Quæ sint
indicia devictæ gule.*

1. **P**rimum tibi certamen adversus gulæ vitiū in eundum est, quæ pabulum ceteris subministrat. Morti corporis & animæ nos gula iniiciavit. Primi enim parentes nostri, pomi interdicti esu omnes homines, antequam gignerent, peremerunt. Nunc eadem animarum hostes utuntur, ut enervato omni vigore nos proterant & conculcent. Hinc stupor, languor & tedium: hinc scurrilitas, loquacitas, dissolutio: hinc immunditia, rixæ, contemtiones: hinc intentis hebetudo, destructio omnium virtutum: hinc rei familiaris profusio, hinc egestas, hinc longa morborum series & ipsa denique mors graviori ciborum sarcinâ accelerata. Pauci sunt infirmi, quos gula ad ægritudinem non adegerit. Nam si noxiis humoribus ex nimio cibo & potu congestis careat corpus, tentari quidem à morbo, sed non suabigi posset. *Plures occidit gula, quam gladius.*

2. O vilissimam ventris servitutem! o inexplebilem cupiditatem! Modicum tibi corpus natura præbuit, vincis tamen vastissimorum & edacissimorum animalium aviditatē. Taurus paucorum jugerum pascuis impletur, una sylva plures nutrit elephantos: tibi angustus est orbis nō sufficit ventri tuo quicquid volat in aëre, quicquid natat in undis, quicquid latet in sylvis. Aspice potentum culinas & concursantes inter tot ignes coquos: vide servorum & ancillarum sudantem cohortem: vide stragem animalium & natantia vino penuaria: observa quantâ sollicitudine argentum ordinant pueri, quantâ arte disponunt fercula, inferunt patinas, scindunt aves: quantâ celeritate discurrunt ad ministeria. Vix credes unam esse domum, cui tot Consulū & Regnorū vina promuntur; cui mensæ tanto tumultu apparetur. Non præcipio ut subtrahas ventri alimenta. Contumax est, non potest vinci, quotidiano indiget cibo. Verum latet hic dolus & subtilissimus concupiscentiæ laqueus, quo sœpè anima irretitur obtentu necessitatis negotium

V ij

obumbrans voluptatis. Vis scire quām parvo fames extinguitur? Te ipsum numera, metire corpus, stomachum consule. Scies non esse necessarium, quod mensuram excedit. Naturae pauca sufficiunt, luxuriæ nihil.

3. Fames non est à ambitiosa, contenta desinere quo desinat non querit. Elapso momentaneo palati iudicio, non suavius sapit pretiosum, quam vile. Si esuris, edendum est: si sitis: bibendum. Sed utrum panis plebeius sit, an filagineus: utrum aqua ex proximo amne excepta, an multā nive refrigerata, nihil pertinet ad naturam. Hoc unum illa jubet, sedari famem, sitim extingui. Pisces è supero, inferoque mari, à fluvii & lacibus evocati, detractæ è cœlo aves, eruptæ è sylvis feræ, diversa vini genera & omnia Apicci condimenta infelicitis luxuriæ tormenta sunt. Epicurus sobrium viētum voluptatis gratiâ commendat: nihil est enim tam lautum, quod nausea non reddat insipidum; nihil tam insuave, quod delicatum non faciat fames. Vis omnem cibi & potus superfluam curam abiicere? exitum specta. Citò morieris, & corpus istud tantâ epularum varietate nutritum fœdis vermbus pabulum erit. Considera quali convivio te escam præparas, & sic carnem nutri, ne mentem opprimas. Cibo utere, qui parabilis sit & ubique occurrens, nec patrimonio gravis, nec valetudini. Magna pars libertatis est benè moratus venter & patiens contumeliæ. Multa quām supervacua essent non intelleximus, nisi cum deesse cœperunt. Eget corpus almoniâ, non cupediis, aut lautitiis.

4. Non est autem quod te laudes, si contempseris superflua. Tunc laudabilis eris, cum contempseris necessaria: cum tibi persuaseris fôrdidum panem ad viētum, modicum vinum & debile, vel aqua debilitatum ad potum satis esse: cum didiceris herbas non tantum pecori, sed homini quoque nasci. Tunc te admirabor, cum solam necessitatem, ac virium reparationem, Deique gloriam in cibo sumendo spectabis: cum lauiores epulas & ma-

gnatum convivia contempseris : cum invitus ad mensam accedes , sicque alimenta sumes , quemadmodum pharmacum ægroti : cum voluptatem gustus , quia tolli non potest , compescere & moderari studueris : cum tibi molestum fuerit quidpiam delicatus , valetudine exigente , accipere : & cum vera denique mentis & corporis puritate imbutus fueris. Non enim in corporis attenuatione probatio abstinentiæ sita est , sed in perfectione castitatis.

C A P . V . *De Luxuria. Quām turpe sit hoc vitium. Quām facilis in id lapsus , & quomodo evitandus. Voluptas animi sectanda , quæ solida est.*

1. **N**ullum vitium isto turpius , nullum de quo magis erubescamus. Vel nudum ipsius nomen non carere ignominia edixit Apostolus præcipiens , ut quæ hujusmodi sunt nec nominentur in nobis. Hinc ille pudor , quo solent ingenui ac probi homines affici , si semel admisum aliquod immunditiæ peccatum aliis innotuisse suspicentur. Hinc lubricos adolescentiæ errores quidam in secretissimo pœnitentiæ tribunali ministro Christi abscondunt , æterna potius tormenta cum æterno dedecore subire post mortem eligentes , quām imaginariam hujus vitii infamiam in hac vita. Huic autem limo infixus vix emergit. Conclamata est ejus salus , quem hæc lues infecit. Quid enim possunt ad hoc humanæ vires ? *Nemo potest esse continentis nisi Deus det.*

2. Primum itaque hujus morbi remedium fervens ad Deum oratio est , ut ipse te sanet & præserver , qui solus potest. Tum impuris cogitationibus resistere in ipso accessu oportet , eâ celeritate quā ignitum carbonem excutis à vestimento. Væ tibi , si te semel dimiseris ad aliquid quantumvis minimum in hoc genere deliberandum. Proxima ditioni est arx , cuius gubernator incipit cum hoste miscere colloquia. Omnis item præcidenda pravitatis occasio ab otio , à gula , ab omni specie impura , à malorum convictu & societate : nec quidquam in hac lucta negli-

gendum. Sunt etiam in justis quædam hujus vitii reliquiae omnino extirpanda: est latens quidam serpentis fibilis, sunt quædam affectiunculae, quæ tametsi malae non sint, sunt tamen principia peccatis præludentia, quibus sensim sine sensu fascinata mens, nisi statim abrumpas, adhæredit. Numquam magnus eris, si hæc minima spreveris. Magna à parvis initium sumunt.

3. Ante omnia cavendum ne te nimia tui fiducia decipiat. Quisquis non timuit jam lapsus est. Quot & quales viri post confessiones & victorias, post signa & magnalia, incauto fœminæ aspectu corruerunt? Non affero hic Samsonis, Davidis & Salomonis toties decantata exempla. Sunt alia recentiora & quotidiana. Et ut desint aliena: habes tu ipse in te unde erubescas, unde discas non altum sapere, sed timere. Nonne extremæ dementiæ est inter tot omnium ètatum & gestum documenta adhuc aliquid audere & non vitare discriminem? sed hæc est semper humanæ pervicaciæ incredulitas, ut nunquam creditat alios cecidisse, nisi & se viderit interire. Facta est mulier à Deo adjutrix viri, sed dolo serpentis personam sumpsit hostilem. Nihil in illa, nisi quod feriat, quod urat, quod interficiat. Nulla est hyæna, nullus basiliscus, qui cum illius voce & oculis conferri possit. Ah fuge ejus aspeetum, fuge colloquium quicunque tuam optas salutem. Suum morem illa retinet, semper hominem expellit è paradiso.

4. Familiare hic est multas prætexere excusationes necessitatis, consuetudinis, putæ intentionis: Sed latitant sub specie boni ingentia mala. Inde enim prosiliunt nocturnæ libertates, incauta colloquia, gestus leviores, modestiæ neglectus, crebra munuscula & quædam hilaritudines, quibus paulatim deponitur pudor & tota demum exiuit verecundia. Cresciuit hæc per intervalla & qui rubore suffusus ad sola mulierum vestigia horrescebat, jam vultu constanti lascivientes oculos, nudatumque pectus intuetur & blando intus operante veneno prius dam-

na patitur, quām periculum senserit. Sic paulatim rationis oculus caligare incipit, postea obcœcatur. Sic anima cœlo nata affigitur humi, immemor Dei, immemor sui; donec flamma concupiscentiæ semper duraturo incendio absorbeatur. O miseri, quorum fœdæ & momentaneæ voluptates tam luctuoso exitu terminantur! omnes puto Sardonicis herbis saturos esse, moriuntur & rident.

5. Quid quæris stultus homo, inops proprii consilii, alieni desertor? Voluptates? Deus Cœlo æternas reposuit. Vis hujus sæculi fallaces & excludi æternis? Ubi ratio, ubi prudentia? Cœlum intuere & omnes ejus beatissimos cives. Olim panem cum cinere, potum cum fletu miscebant. Vidisses eos in mundo angustiis undique oppresos, sordibus obscuratos, semper lacrymis madidos, semper vigiles in oratione, extra omnem mundi lætitiam positos. Viam sibi ad cœlum equuleis, gladiis & crucibus fecerunt. Respice infernum & desperatam damnatorum turbam ignibus, tenebrisque perpetuis sepultam. Hi falsa mundi gaudia, carnisque delicias & luxum olim amplexi, nunc serò cognoscunt quantum sibi nocuerint voluptates. Hæc sedulò contemplare & si credis, exhorresce. Momentaneum est quod deleat, æternum quod cruciat.

6. Quid si etiam in hac vita placet voluptas, cur non magis solida, vera, impolluta, immutabilis, quæ ex animo benè composito venit, ut de tuo te ipsum oblectes? Carnis voluptas mollis est, caduca, fucata, semper mero & unguento madens & timens publicari. Ejus statio fornices, popinæ & loca censorem metuentia. Si foris niter, introrsus misera est. Cum incipit, tum extinguitur & in ipso sui usu perit. Voluptas verò animi tranquilla, excelsa, invicta, semper secura & stabilis nec satietatem habet, nec pœnitentiam. Nullus eam pudor comitatur, nullus sequitur mœror, nec suum unquam possessorem destituit. Hâc si frui desideras, omnes carnis illecebræ vincendæ sunt. Vera enim voluptas est omnem contemnere voluptatem.

CAP. VI. *De Avaritia. Malitia ejus perstringitur. Collatio pauperis & divitiae. Opum fallacia & vanitas.*

1. **H**æc est Avaritiæ pessima fraus, quam prænoscere debes, ne decipiari. occultat se, nec ullum reperies qui se avarum confiteatur. Ille divitias congregat, ut sibi & liberis prospiciat: hic ut pauperum indigentia consulat: alius ut redimat piis operibus peccata sua. Sed congestum atrium nemo istorum erogat; immo nova semper quæruntur, quæ addantur acervo & dum quærendo teritur tempus, elabitur vita, cui opes quærebantur. Ut ægrorum sitim aqua non sedat, quam sitibundus placido amne fluentem videt & agitat manu; nisi os admoveat & gelidos hauriat latices: Ita Avarus nullâ re satiari potest, quia menti ejus, in qua residet Avaritia, thesauri & pecuniae non possunt illabi. Animam Deo capacem solus Deus implere potest.

2. Congeratur in te, Avare, quicquid omnes locupletes possederunt, ultra Salomonis opulentiam fortuna te provehat: terram marmoribus, auro parietes, gemmis laquearia abscondas. Non tantum habere tibi liceat, sed calcare divitias. Accedant statuæ & picturæ & quicquid ars luxui serviens elaboravit: majora cupere ab his disces. Naturalia desideria finem habent, ex falsa opinione nascentia infinita sunt. Quid refert quantum tibi in arca, quantum in horreis lateat, si non computas acquisita, sed acquirenda? Toto eget mundo, cuius non expletus mundus cupiditatem. Atque utinam considerares, quanta secundum mala divitiae afferant, quanta auferant bona: Invenires procul dubio quam vera sit Apostoli sententia, *Radix omnium malorum est cupiditas.* Inde germinant fraudes, inde consurgunt bella hinc perjuria, hinc prodiciones oriuntur. Tolle avaritiam & non est discordia: desinat avaritia & cessat ambitio. Hæc terram latronibus compleat, mare pyratis, urbes tumultibus, domos insidiis, forum injustitiae. Quædam nimirum societas, penè etiam nominis, est vitiis & divitiis.

3. Confer, si placet inter se pauperem & divitem: cerne vultum utriusque. Hic plenus sollicitudinum tetricâ facie tristitiam animi prodit: ille serenâ fronte sincerum mentis gaudium ostendit: Hujus inter ærumnas cor exedentes bracteata felicitas est; illius mens mœroris vacua internæ pacis jucunditate perficitur. Hic querendi cupiditate anxius, amittendi metu miserrimus, ad omnes fortunæ injurias expositus, quò plus habet plus cupit. Ille in paupertate dirissimus optat quod satis est, nihil timens quia nihil habet quod sibi adhæreat, quod sibi eripi possit. Quàm lætos dies dicit pauper, quàm placidas noctes! Dives autem æger animi morbum suum, quocunque pergit, secum trahit spinis undique circumseptus. Sed lethalis est sopor, qui non sentit aculeos.

4. Audi miser, cuius inexplebilis avaritia est. Omnibus licet locis tecta tua resplendeant: licet immensos pecuniarum acervos possideas: quamvis ultra mare latitudinata tua extendantur: veniet tamen, veniet dies ab æterno statuta, quâ hæc omnia simul cum vita amaro & invito animo deseres. Abibunt, peribunt hæc omnia, propter quæ pereundum tibi erit. Tunc demùm intelliges quàm contemnenda mireris, simillimus pueris, quibus omne ludicum in pretio est. Illos reperti in littore calculi leves, & aliquid varietatis habentes delectant: tu circa auri glebas, splendidosque lapillos insanis carius ineptus. Non dico ut divitias non habeas, si te Deus divitem fecit, sed ut habeas nulli detractions, sine cuiusquam injuria partas, sine sordidis quæstibus, sine sollicitudine & superflua cura. In domum illas, non in animum recipias, paratus his carere cùm Deus voluerit. Ille verè locuples est, qui divitiis non eget. Ne expectes, ut fur vel casus eripiant tibi quæ possides, occupa tu eorum vices & aufer tibi ipsi animo circa exteriora indifferenti, quicquid alii auferre possunt. Tuus eris, si hæc tua non erunt.

5. Disce à te removere pompam & cultum vietumque tuum non ad exempla compone, sed ut Christiani sua-

dent mores. Potest paupertas se in divitias convertere
advocatâ frugalitate. Exiguum natura desiderat , non esu-
rire , non sitire , non algere. Potes habitare sine marmo-
rario fabro , potes vestiri sine commercio Serum. An non
sitim extinguet poculum , nisi gemmeum aut crystallinum
sit , quo simul bibas & timeas ? Gladius non scindit pa-
nem , nisi ebur & margaritæ in capulo niteant ? Pelvis
fictilis non excipiet manuum sordes ? Nec lumen lucerna
ministrabit , nisi sit aurificis opus ? Auro servit , qui se
auro ornari putat. Quām utilius foret veras amare divi-
tias , quæ hominem meliorem faciunt , quas nulla fortunæ
iniquitas , nec ipsa mors auferre potest ? Quid pauperiem
times integrum Regnum ferens in corde ? Regnum Dei
intrâ te est. Absit ut aliud bonum quæras. Quære bonum
tuum : *Nemo bonus nisi solus Deus.* Hic tibi possessio &
regnum sit , in quo sunt omnia bona , omnes thesauri. Cui
Deus totum est , huic mundus nihil est.

6. Quicquid nitidum , quicquid magnum in mundo ap-
pareret , inane est , fictitium est , nihil est. Quid miraris
cùm vides hominem auro & purpurâ indutum , & magnâ
servorum catervâ stipatum ? Pompa est. Ostenduntur hæc
omnia , non possidentur : & dum placent , transfeunt.
Non capio hujus rei fidem à Lycæo , vel à Porticu , non à
cruce Christi , non ab æterna Dei sapientia ; sed ab ipso
mundo , ab ipsis vanitatum mancipiis. Audi Amanum
opibus , potentia , honoribus super omnes tunc mortales
eximum. Convocat auditores & coacto cœtu omnia nihil
esse pronunciat. *Nihil* , inquit , *me habere puto* , & causam ad-
jecit : *Quamdiu video Mardochæum* sedentem ante fores Re-
gias. O ludibria ! ô cæcitatem ! Sæpe legi & audivi omnia ni-
hil esse collata cum bonis , quæ virtus parit , quæ nutrit æter-
nitas : sed vehementius depresso sunt , coram nihil visa sunt
nihil. Nihil igitur facis , si nihil spernis. Spernendum est ali-
quid quod in te sit , quod aliquid sit. Comprimenda cupi-
ditas , ac veluti sub vinculis habenda , ut assuescas colere
paupertatem & usu rerum res ipsas metiri. Facile autem
contemnes omnia , si semper cogites te moriturum.

C A P U T VII. *De Ira. Charakter irati. Effectus, cause,
& remedia Irae.*

1. **I**RASCOR IRÆ. Sola hæc ira justa est adversùs monstrum rabidum & execrabile, adversùs affectum maximè implacidum & turbulentum, quid si semel invaserit hominem, vix in eo humanæ naturæ vestigia relinquit. Ira brevis insanía est, sui impotens; armorum, sanguinis & suppliciorum avida; decoris oblita, necessitudinum im-memor, in ipsa irruens tela ut alteri noceat; ruinis simili-ma, quæ super id quod oppresserunt franguntur. Lin-quit decor omnis iratos. Flagrant & micant oculi, tumes-cunt venæ, horrent capilli, quatuntur labia, strident dentes, spumant ora, rabida vocis eruptio colla disten-dit. Non est ullius affectus facies turbatior. Fœdatur vul-tus, courrahitur frons, nutat caput, vacillant pedes, agitantur manus, & totum corpus indecorâ jactatione huic illuc circumfertur. Adjice minaces gestus, complosas manus, pulsatam humum, percussum pectus, evulsos crines, scissa vestimenta & sanguinem ab imis præcordiis exæ-stuantem. Qualem putas intra esse animum, cuius extra imago tam fœda est? Qualia Poëtæ inferni monstra fin-xere ignibus ardentia, succincta serpentibus, diroque mugitu perstrepentia: talis est irati habitus, turpis, cruen-tus, æstuans, crudelis & in ferinam rabiem degenerans. Cætera vitia licet abscondere & in abdito alere: ira se profert & in faciem exit, ac velut ignis omnia corripit: quantoque studiosius eam tegeré conaris eò amplius effe-vescit. Modi nescius est, nec frænum patitur, quem ira possedit.

2. Reliqua item vitia certis quibusdam finibus coér-centur: iræ nihil intaetum, nihil est inaccessum: cœlum ipsum petimus iracundiâ. Hinc blasphemiae, hinc queri-moniæ adversus Deum; hinc de ejus providentia motæ ab impiis controversiæ. Nec his dumtaxat irascimur, à qui-bus nos læsos existimamus, sed futuræ etiam injuriæ co-

gitatione offendimur & qui facturus esse injuriam, falsa plerumque imaginatione, creditur, jam fecit: adeò ingeniosi in vitiis sumus. Sæpè nescimus quibus irascamur, irascimur tamen: & si alius desit, in quo impetus ille frangatur, contra nos ipsos excandescimus. Ut verò scias non ex sola injuria nasci hunc affectum, iræ etiam nostræ sentiunt rabiem, qui nec offendere nos possunt, nec contumeliâ afficere. Sic vestimenta sæpè scindimus, vasa projicimus, frangimus calatum, laceramus chartam, cùm his uti ex animi sententia non valemus. Sic in furorem sæpè nos agit aut observatus calix, aut mensa negligenter posita, aut parùm agilis puer, aut tracti subsellii stridor & alia multa, quæ iram nostram nec meruerunt, nec sentiunt. Sic refractarius equus & contumax, sic canis oblatrans & perstrepentes aviculæ; sic importunus muscarum volatus, aut culicum morsus bilem concitant & impatientiæ nostræ pœnas luunt. Vide quād demens sis. A rebus sensu parentibus & à brutis animantibus exigis pœnas, quibus par effet tuam potius insaniam castigare.

3. Quòd si libeat iræ damna & effectus intueri, nulla pestis humano generi pluris stetit. Videbis cædes & urbium clades & totarum exitia gentium. Videbis pestilentiam manu factam & magnam occisorum struem, fusique sanguinis rivos flumina inficientes. Aspice nobilissimum civitatum fundamenta vix notabilia, has ira dejecit. Aspice solitudines sine habitatore desertas, has ira exhausit. Aspice incendia domos concremantia, violatos fontes venenis, extinctas familias; hæc scelera ira patravit. Ferarum conventum dixeris non hominum, nisi quòd illæ inter se placidæ sunt, hi mutuâ laceratione se perimunt. Accedit hæc vitio hæc pernicies, quòd hominem exuit similitudine Dei, cuius opera tranquilla sunt: mentem obcæcat ne verum videat, ne aliorum monitis obsequatur: omnes animæ facultates turbat & pervertit, cumque pessimè totum hominem afficiat, vix illi tamen

ulla turpitudo inesse creditur, adeò vulgus gloriosum existimat irasci. Sed præstat ad remedia accedere, quibus hæc prava affectio, si non tolli omnino, rationis saltem imperio subjici & ad salutarem modum cogi possit.

4. Ante omnia optimum est primum iræ irritamentum, protinus spernere & ipsis repugnare principiis: nam si cœperit ferre transversum, difficilis ad salutem recursus est. Faciet quantum volet, non quantum permiseris. Cum hostis portis se intulit, modum à captivo non accipit. Facilius enim est non admittere perniciosa, quam admissa moderari. Pars superior mundi & ordinatior, ac propinqua sideribus nec in nubem cogitur, nec in tempestatem impellitur, sed caret omni tumultu: inferiora sunt quæ fulminant. Ita animus sublimis, quietus semper & compositus, ac in statione tranquilla collocatus, intra se mala premit, quibus ira contrahitur & verbis suis minimum libertatis permittit: scit enim cum iratus fuerit, mala non tolli; sed fieri graviora. Sicut aves, dum viscum trepidantes excutiunt, plumis omnibus illinunt: sic omnis indignatio in tormentum suum proficit. Plus nocet ira, quam injuria. Qui irascitur, se ab alio contemptum putat; verus autem æstimator sui non vindicat, quia non sentit. Ultio confessio doloris est. Non est magnus animus, qui repetit mordentem.

5. Auditâ voce maledicentis statim animadvertisendum, non quid illum audire, sed quid te deceat loqui. Non tantum licere debet alienæ perversitati, ut serenitatem tuam obducat. Deus, qui omnia potest, tot improbos homines suffert, tu ceteris deterior unum ferre non poteris? Ridiculum est te non corrigere malitiam tuam, quod potes; aliorum velle tollere, quod non potes. Si tot peccatorum reus es, quicquid pateris nihil est comparatione gehennæ, quam mereris. Quis es tu, cuius aures lædi nefas sit? Seipsum offendit, quia peccat, qui facit injuriam tibi enim quid accedit? Id quod ab æterno decretum est pro tua salute. Audi quid dicat Deus. *Sed dimiseritis, &*

ego dimittam vobis. Ad hoc tonitruum si non exergiſceris,
non dormis, sed mortuus es. Danda est alienis vitiis ve-
nia, ut tuis imperes.

6. Tollenda ex animo suspicio est fallacissimum iræ in-
citamentum. Ille me parūm humanè salutavit, ille inchoa-
tum sermonem citò abruptit, illius vultus aversior visus
est. Nec deerunt suspicione argumenta & conjecturæ,
cùm semper ad malum creduli simus. Major injuriæ pars
constat vitio interpretanti. Quare simplicitas necessaria
est & benigna rerum æstimatio. Age contra te absentis
causam, sitque tibi hoc vitium suspectum, quod quæ in-
viti audimus, libenter credimus & antequam judicemus,
irascimur. Dandum semper est tempus, veritatem dies
aperit. De parvula summa judicaturo res tibi sine teste
non probaretur, amicum verò condemnas, antequam
audias? Rebus quæ referuntur statim fidem adhibere,
imprudentis hominis est. Multi mentiuntur, ut decipient;
multi, quia decepti sunt. Qui aliquid clam dicit, penè
non dicit. Quid iniquius, quam secrete credere, palam
irasci? Denique non expedit omnia videre, omnia audire.
Non accipit injuriam, qui nescit.

7. Cùm scis aliquem male loqui de te, interroga con-
scientiam tuam, an ipse priùs de illo loquutus sis. Tum
cogita de quām multis loquaris. Faciet te moderatiorem
respectus tui, si te ipsum consulueris. Nam cur alienæ
luxuriæ non ignoscis, qui nihil tuæ negasti? cur menda-
cia persequeris, ipse perjurus? cur ipse perfidus, fidei
acerrimus exactor es? cur tibi licentiam in alios permit-
tis, in te non vis? Succurrat non tantùm quid patiaris,
sed quid feceris. Quicquid in alio reprehendis, invenies
in sinu tuo. Omnes mali sumus, communi vitio danda
est venia. Et si nihil tale fecisti, at potes facere. *Quis stat,
videat ne cadat.*

8. *Quid novi sit, si inimicus nocet, amicus offendit, fi-*
lius labitur, servus peccat? Hæc omnia ita consueta sunt,
ut rosa vere, fructus æstare. Sicut properanti per fre-

quæntia urbis loca alicubi labi necessè est, alicubi retineri, alicubi respergi: ita in hoc vitæ actu dissipato & vago multæ incidunt querelæ, multa impedimenta. Cur indignaris à viro malo injuriam passus? Quod suum erat fecit. Tu verò, si bonus es, boni viri munus exerce: cura ut illum bonum facias. Hoc autem non fit ultione, sed patientiâ & beneficiis: & si non bonum, saltem benevolum reddes: si neutrum, te procul dubio meliorem efficies. Ille detraxit de fama tua, graviter tibi infensus est. Quid hîc tu? Non credo. Si quid dixit, errore deceptus dixit, mente non malâ, zelo bono, prodesse voluit, aut certe læsus à me fuit. Non est injuria pati quod prior feceris. Verè illam culpam admisi, reus sum, æquum est justitiæ cedere. At gratis impugnor & sine culpa. Quid inde à Christum imitabor & dicam cum Propheta, *Obmutui & non aperui os meum, quoniam tu fecisti*. Alienæ dicta aut facta tibi mala non erunt, et si reverà mala sint; nisi malè eis utaris. Talia sunt, qualis usus eorum.

8. Quæ est causa offensionis? Opinio. Tolle damni opinionem & nihil nocebit tibi. Nulla res attingit, aut movet animum, aut ad ipsum intrat: solus ipse se ipsum mouet & quale tulerit judicium, talia fiunt ea quæ accidunt. Nihil te lædet, nisi tu te ipsum læseris. At malus est, inquis, qui me persequitur. Expecta, dabit alteri pœnas, quas debet tibi & jam sibi dedit, quia peccavit. At ratione præditus est? quare non emendat se? Et tu qui ratione præditus es, cur non corrigis impatientiam tuam? cur non vincis in bono malum? Alienæ vitia in oculis habes, à tergo tua sunt. Sed age quisquis es, cui dulce videtur ulcisci, datur tibi optatæ ultiōnis facultas, cum hac tamē justissima lege, ut à majori incipias. Ordo injuriæ præscribat ultiōnem. Graviorem omnium hostem iram tuam habes, hæc plus te offendit: ab ista auspicare vindictam. Non sunt quærendi in platea adversarii, dum infensor domi latet. Plato iratus in servum, manum quam percussurus sustulerat, suspendit dicens, Cæderem, nisi

irascerer. Prius voluit iracundiam flagellare, quām servum; dignorem flagris existimans dominum irascētem, quām servum negligentem. Quō quisque honestior est, eō fortius iram comprimit.

10. Judices & qui præsunt populis iram interdum ostendere debent, ac etiam exhibere; ita tamen ut rationem non præveniat, sed quasi ancilla subsequatur. Corrigendus est qui peccat & castigandus, sed sine ira. Si vir bonus irasci turpiter factis debet, omnis illi per iracundiam vita transbit. Quod enim momentum erit, quo non videat improbanda? Deficiet, si toties à se iram, quoties causa poscer, exegerit. Placidus itaque & æquus errantibus, talem effectum erga illos habebit, qualem medicus erga phreneticos. Sicut non commoveris ob algores & fervores, qui à tempestatibus suas vices obeuntibus inducuntur: ita nec irasci debes propter injurias, quas improbi homines pro sua natura inferre solent. Ægri intemperantes sunt, in quibus nihil est sani. Satis acerba erga contumeliosum vindicta est, nullam petere ab eo vindictam. Ille lædit ut doleas, si tu non doles, ipse dolebit videntis ereptam sibi contumeliæ voluptatem: adeò fructus injuriæ in sensu & indignatione patientis positus est. Convitia, si irascare, agnita videntur, spreta exolescunt. At turpe est, inquis, contemni, læsumque honorem non reparare. Imo turpe est timore contemni, non enim hoc timet nisi qui contemni dignus est. Non respicit sapiens quid homines turpe judicent: nihil illi turpe nisi peccatum. Contemnor, ait, ab aliquo? Ipse viderit. Ego curabo, ne quid contemptu dignum agam, aut loquar. Odit me aliquis? viderit. Ego omnibus ero placidus & benignus. Sic invicta patientia improborum malitiam superat & fatigat; Deumque imitatur, qui ignoscit, qui patientissimus est & scelera nostra suis beneficiis vincit. Majoris animi est non agnoscere injuriam, quām ignoscere.

CAP. VIII.

CAP. VIII. *De Invidia & Acedia. Vtriusque
descriptio & curatio.*

1. **I**nvidia sui vñdex priùs in propria sævit viscera, quām in proximi bona. Alia vitia ultrix poena à tergo sequitur, huic etiam præire solet. Invidus enim alienam felicitatem suum tormentum & de vicini pinguedine ipse marcescit. Simul peccat & plectitur, quem hæc pestis invasit. Cætera vitia certo alicui bono contraria sunt, hoc omnium bonorum inimicum est, omnium rerum naturam pervertit. Adversatur divinæ bonitati, cui proprium est omnia bona sua communicare: adversatur statui Beatorum, qui aliorum felicitate ut suâ potiuntur: adversatur Christianæ charitati, quæ de bonis etiam inimicorum lætatur: adversatur denique legi naturæ, quæ nos omnia bona nostra aliis etiam optare jubet. Sicut oculus eo morbo affectus, quem Ophthalmiam Medici vocant, splendidis omnibus offenditur: ita invidus aliorum virtute & claritate cruciatur. Invidia dicitur, quia alterius excellentiam nimis videt.

2. Invidet Sathan, sed hominibus, sociorum nemini: tu verò homo cùm sis, hominibus invides, quod nec diabolus quidem facit. Hoc autem animi pusilli est & proprio judicio se ad infima abjicientis: neque enim alteri invideres, nisi eum meliorem te & superiorem arbitrari. Vis invidiâ carere? Sperne hujus mundi fugacia bona & dilige æterna. Amor æternitatis mōs invidiæ est. Non potest mortalia bona aliis invidere, qui sola sempiterna concupiscit. Quis unquam Princeps sutori invidit, aut sarcinatori artium suarum vilia servitia? Non se demittit ad hæc infima mens sublimioribus occupata. Nonne satis est propriis malis angi, quæ tam multa sunt, nisi & aliena bona te torqueant? Nunquam eris felix, si te cruciat felicior. An putas bona, quæ invides, alteri erepta ad te posse transferri? Habet proximus tuus divitias, floret scientiâ, supereminet dignitate. Hæc omnia

C. Bona Opusc. Spirit.

X

tua erunt, si ipsum amaveris. Plurimis abundat bonis,
qui amat aliena.

3. Jungo Invidiæ Acediam, quia utraque tristitia est :
illa de alieno bono, hæc de proprio. Utraque ad pusillos
spectat ; nam *Parvulum occidit Invidia* : & Acedia vitium
est languentis animi, bonorumque spiritualium tædio
laborantis, qui rei magnitudine ac difficultate deterritus
nihil unquam homine dignum aggrediatur. *Vult & non*
vult piger, semper varius & inconstans, sibi gravis, aliis
molestus & continuo sui tædio pœnæ incubans suæ. Si-
milis est trocho, qui in orbem quidem agitatur, sed non
progreditur ; atque ita per flagri vim movetur, ut tamen
semper insistat. Voluisse eum aliquid deprehendes, sed
non fecisse. Omnis ejus operatio insipida & instar te-
pentis aquæ vomitum provocans non hominibus tantum,
sed & ipsi Deo. Frustrâ igitur salutem speras, nisi excusso
torpore generosos assumas spiritus & acrioribus stimulis
ad magna te cogas. Ut avis ad volatum, ita homo naſci-
tur ad laborem ; Et ut desint labores pro Deo assumti,
satis cuique pœnarum imponit mundus. Quantum ille
laborat, ut divitias consequatur ? Quantum ille patitur,
ut ad optatam perveniat dignitatem ? Magno vitia colun-
tur. Quid si fugacia bona tanto sudore mercaris, cur non
parem adhibes diligentiam ad felicissimam æternitatem
comparandam ? Ah pudeat segnem esse in re tanti mo-
menti. Brevissimus labor est, merces æterna. Nihil est
tam arduum & tam difficile, quod mens humana Deo
duce non vincat. Fortiter aude & difficultatum spectra
disparebunt. Quicquid sibi animus imperavit, obtinuit.
Age quod potes, omnia poteris. Adjuvat facientem.
Deus.

CAP. IX. *De Superbia, Ambitione & inani gloria. Icon superbi. Dignitatum vanitas & pericula. Tumoris mala & alexipharmacaca.*

1. **S**uperbia, ambitio, & inanis gloria cognata sunt vitia, è quibus tanquam Oceano omnium malorum flumina oriuntur. Nam cum sibi pro fine propriam excellentiam proposuit homo, huc omnia dirigit, spreto Dei cultu, neglectâ hominum reverentiâ. Et si illi aditus ad gloriam non patet nisi per scelera: per scelera ad gloriam ibit; viamque sibi ad prætensem decus aperiet, per dolos & fraudes, proximique ruinam & cædem. Superbus Deo odibilis, humano generi intolerabilis, omnia studia & opera sua ad captandam hominum laudem inflebet. Se gradu potiori dignum putat, sibique in illo maximè complacet. Majora viribus temerè aggreditur, omnibus negotiis se ultrò ingerit, se ipsum impudenter extollit, cæteros aspernatur. Callide simulat humilitatem, ut à se removeat ambitionis suspicionem. De gradu dejectus omnia querelis implet, suscitatque rixas & odia. Erga inferiores ferum se & truculentum exhibit: erga superiores assentator est quovis mancipio timidior & obsequentior. Bona, si quæ habet, non Deo, ut par est, sed sibi arroganter attribuit. Affectat in omnibus videri, deque rebus altissimis, quas ignorat, quasi ex propria experientia subtiliter differit. Aliorum facta curiosè inquirit, temerè iudicat, severè damnat: auget vitia, laudem imminuit. In sermone & incessu fastum quemdam præ se fert aliorumque contemptum. Odit correctionem, respuit consilia, monitis non acquiescit. Bona sibi opinatur adesse, quibus caret: & quæ habet multò majora sibi fingit, quam sint. Ideo indignatur & ad pessima quæque flagitia se dejicit, si cæteris tanquam dignior non præferatur, si se & sua negligi suspicetur. Fluctuat cor ejus perpetuis motibus, quia cum honor quem cupit, in aliena sit potestate, necesse est illum turbidis affectibus conti-

nuò agitari. *Initium omnis peccati est superbia.*

2. Pone in statera , si sapis, & compara cum minima æternæ felicitatis particula quæcumque tibi optanda in hoc sæculo videntur , regna , imperia , orbem denique totum ; excutiet illa suo pondere mundum universum cum pompis suis , tanquam folium , quod vento rapitur. Erige te ergò ad æterna & te dignum fac cœlo , cui natus es. Excute superbas tuæ excellentiæ cogitationes & te veris bonis metire. Si te Cæsar adoptasset in filium , quis ferret supercilium tuum ? Nunc autem Dei filius es , Christi sanguine redemptus : cur non cogitas originem tuam? cur te abjicis ad terrena tuo genere prorsus indigna ? Ad Cœli & siderum dominatum te vocat Pater : ad posses- sionem semper duraturam. Hic ingentes sume animos , hâc promissione extollere , ab hoc Patre nobilitatem tuam jaæta , ad ejus similitudinem mores tuos compone. Hæc est via , quæ ad veram gloriam perducit.

3. Quid sunt sceptræ ? quid coronæ ? Fulgidæ compedes & clara miseria , quæ si plenè hominibus nota esset nunquam de solio litigarent. Plura essent regna , quàm reges. Magna servitus est , magna fortuna. Isti , quos vulgus beatos censet , longè aliter de se sentiunt : nam gravior ipsis incumbit felicitas , quæ graves illos populo redit. Tunc laudant otium lene & sui juris. Tunc odio est illis fulgor , quem priùs admirabantur. Tunc attoniti & trementes de terrenorum vanitate philosophantur. Tunc mortem formidant & tremendum Dei judicium , ante cujus conspectum nihil proderit tanto studio quæsita dignitas , tot parta sudoribus & empta sanguine. Sic igitur vive , ut securum te inveniat illud tribunal. Qui nunc humiliatur , tunc exaltabitur.

4. Insanis , si te putas adeptâ dignitate securum & quietum fore. Quod olim licuit , jam non licebit : minor li- centia in magnis est. Quò altior fueris , eò magis vitia tua apparebunt. Non latet qui in fastigio est. Si qua tibi olim tranquillitas fuit , jam periit. Nullum tibi secretum

liberum erit: nullum poteris diem ex arbitrio tuo disponere. Magni sunt ex alto casus. Frustra requiem ibi quæris, ubi omnes periculum, & laborem, multi miserum vitæ exitum invenerunt. Non capiunt securas dapes regiæ mensæ. Auro & gemmis bibuntur toxica. Quot Reges proprio sanguine solium purpuratunt? Lubrica in summo statio est, pendula omnia & præcipitio proxima. Tutiūs itur per plana. Quām magnus admirantium & plaudentium numerus, tam magnus invidentium est. Quanti ibi insidiantum acervi & oppugnantium? Quām intuta omnia & suspecta? Non servis fides, non amicis, non filio, non fratri. At humi jacentem domum non intrant scelera. Securus vivit qui latet. Nullum timet, quem nemo timet.

5. Si equum videres, aut canem inter cætera suæ speciei individua principatum assumere, numquid risum cohibere posses? Tu verò majori cachinno dignus es, si super reliquos homines te extollis, quod ditior aliis, seu potentior sis. *Quid superbis terra, & cinis?* Nemo efferri potest nisi ex proprio bono. Quod est autem tuum bonum, si omnia à Deo accepisti? Nihil tuum nisi peccatum. Quod si omnia accepisti, illi redde gloriam, qui tibi bona sua largitus est. Numquid equus equo præfertur, quia multum pabuli habet & multum hordei, quia frænum aureum & gemmara ephippia? Nequaquam; sed qui celerior est alium antecellit. Ita homo, ni stultus sit, gloriam ex eo non quæreret, quod est extra se: Sed melior inquis, sum & nobilior cæteris. Si hoc dicis, omni honore indignus es, quia nemo dignè honoratur, nisi vir bonus, qui honorem spērnit & gloriam. Vera nobilitas nescit extolli & ubi vitæ splendor est, ibi quoque modestia reperitur. Maxima sublimitum gloria est, quām maxime se submittere.

6. Cognosce conditionis tuæ imbecillitatem, metire corpusculum tuum, multa reperies in te ob quæ deprimi debeas, nihil quo possis extolli. Noli Geometras &

Philosophos spernere, omnis terra punctum est. Quām miserè desipis, si regna in pūcto statuis & dividis domi-
nationes. In parvo nemo magius. Hæc terra, quam tu-
mido incessu premis, mox te premet: nec amplius ex ea
possidebis, quām frigidis & putrescentibus membris oc-
cupabis. I nunc & in hoc nihilo magna & immortalia
ædifica. Hic furores tuos, hic elatam exerce insolentiam.
Dilata hic cupiditates tuas, hic acies, hic bella molire.
Cum multum insanieris, serò tandem cognosces quām
vana dignitatum nomina, quām fallaces honorum tituli.
fuerint. Vitreum est quicquid hic lucet, dum splendor
frangitur. Magnæ arbores diù crescunt, unâ horâ extir-
pantur.

7. Magnum superbiæ irritamentum præcidisti, si la-
teas. Nemo oculis suis laetus est, nec paucorum quidem
& familiarium, sed apparatus vitiorum suorum pro mo-
do turbæ spectantis expandit. Quis eam, quām nulli
ostenderet, induit purpuram? Quis posuit secretam in
auro dapem? Quis sub umbra rusticæ arboris luxuriæ suæ
pompam solus explicuit? Ambitio scenam desiderat, nec
ullibi potentius vires suas exerit, quām inter hominum
laudes. Apis si mel fecit, equus si cucurrit, arbor si fru-
ctum protulit, nihil ultra quærunt: homo plausum desi-
derat, dígitoque monstrari, & dici, Hic est. Sed si atten-
tiùs consideraveris, qui sunt isti, à quibus optas laudari,
nihil facilius quām vulgi plausum contemnes. Homines
vani & mutabiles sunt, quos sæpè dicis insanire, qui se
omni horâ amentiæ damnant & sua sæpè reprobant consi-
lia. Brevis vita est & laudantis & ejus qui laudatur; fit-
que id in angulo terræ, quæ punctum est; ac ne ibi qui-
dem omnes consentiunt, nec quispiam sibi ipsi. At ma-
gnum est laudari à posteritate. Ab his nimis quos ne-
que vidisti, nec unquam videbis. Cur non doles te non
fuisse laudatum ab his, qui ætatem tuam antecesserunt?
sed finge immortales eos fore, qui tui recordabuntur, tui-
que futuram immortalem memoriam: quid hoc tibi mot-

tuo proderit ? quid prodest vivo ? Sæpè laudaris ubi non es & cruciaris ubi es. Pretium cujusque rei in ipsa est ; nec melior fit , si laudetur ; nec deterior si laude careat. An sol , si desint spectatores , de luce quidpiam amittit ? An carebit dulcedine ficus , flos venustate , gemma nitore , nisi encomiis celebrentur ? Magnum argumentum est animi ab altiori sede venientis laudes hominum aspernari & seipso contentum esse. Laudes perdis , si desideras : nam quid laudabile in te est ? quanta est fragilitas tua , quanta miseria , quanta salutis tuæ incertitudo ? Servus inutilis es , et si omnia feceris , quæ præstare teneris. Quâ verò fronte audebis dicere te oīnnia fecisse quæ debes ? Time igitur ne intus non sis quod foris diceris : & cave ne ea laudentur in te , ob quæ ipse displices tibi. Redde Deo : quæ ab ipso habes , esse , vivere , intelligere : nihil supererit tibi nisi peccatum. Nihil ergo cùm sis , de nihilo gloriari non potes. Incipies esse aliquid , cùm te nihil esse cognoscas.

C A P. X. *De totius corporis , sensuumque exteriorum moderatione. Quantum corpori indulgendum. Castiganda oculorum licentia. Vestium luxus damnatur.*

HAEC sanam & salubrem vitæ formam teneto , ut corpori tantum tribuas , quantum valetudini satiis est. Durius tractandum , ne animo male pareat. Indulgendum illi non serviendum. Cibus famem sedet , potio sitim extinguat , vestis arceat frigus , domus munimentum sit aduersus injurias temporum : ad alia , quæ inutilis labor veluti ad ornamentum adjecit , subsiste pavidus & time , his enim insidiaæ aduersus animam parantur. Omne honestum vile est ei , cui nimis carum est corpus , qui pro illo nimium timet. Major es , & ad majora genitus , quam ut sis vile mancipium corporis tui ; quod equidem non aliter respicere debes , quam ut vinculum animi & libertatis. Vir probus & sapiens ejus curam habet , non tanquam propter ipsum vivat , sed quia sine illo non potest. Corpus

X iiiij

instrumentum est animæ. Quis autem artifex neglectâ arte
in curandis instrumentis tempus terit? Hebetis ingenii est
 circa corporis ministeria occupari.

2. Quia per sensum fenestras mors in animam ingreditur, stude illos à terrena vita ad cœlestem traducere, eosque sensim abducito à nimia operis quod exercent attentione, ne sc̄ avidius terum terrenarum delectationibus immergant. Servire sensus debent, non imperare. Oculorum in primis castiganda licentia, nam cum celerrimè videant, rerumque plurimarum imagines ad phantasiam & indè ad mentem transmittant, gravium peccatorum semina in appetitu excitant, nisi firmâ custodiâ muniantur. Si exterioris oculi rectitudinem interioris puritas comitetur, Dei vestigia ubique impressa reperies: & cum Deum in creaturis venerari didiceris, ex his suaviter attolles animum ad divinæ Majestatis contemplationem. Mulier compta elaborata luxuria est, nunquam in ea figas obtutum, quia peribis. Comœdias, choreas, torneamenta, theatrales ludos ne spectes; dissipant enim mentem & ludicris occupant curis, ut se ad cœlum erigere nequeat. Ubi errat oculus, errat affectus.

3. Auditus sensus est disciplinæ, per quem notio veritatis & sapientiæ quasi per januam mentem ingreditur. Sepi itaque aures providâ circumspectione, ne pro veritate mendacium, pro sapientia stultitia in penetralia cordis irrumpant. Claude illas oblocutionibus, claude susurris, claude nugis & rumoribus, claude otiosis narrationibus; omnique rei, quæ nihil ad animæ profectum confert. Sieut qui audivit symphoniam, fert secum in auribus modulationem illam & dulcedinem cantûs, etiam cum discessit; ita malus sermo, quamvis non statim officiat, semina tamen in animo relinquit, quæ diutiùs hærent & ex intervallo recurrent. Deum intus loquentem eò frequentius audies, quo rarius homines audieris. Omnia odoramenta arte confecta effeminatorum sunt & male audientium, Ideo rejecto omni odore, fac ut bonis mori-

bus suavissimam virtutum fragrantiam redoleas. Gustum
verò castigabis abstinentiâ & sobrietate: Tactum ciliciis,
verberibus, duriori strato, aliisque asperitatibus. Satius
est corpus affligere & servare; quam noxiis blanditiis &
ipsum & animam perdere in æternum.

4. Cùm ex habitu cultuque corporis internus animi sta-
tus palam fiat, ea procul à te sint quæ solent indicium
esse animi pravi & perturbati. Qui olim sapientes inter
Ethnicos dicebantur, nec digitum quidem sine ratione
exerere viro probo permiserunt. Tantam à te rectitudi-
nem non exigo, sed opto: idque edico, ut abstineas à
risu, à scurrilitate, à dissoluti hominis licentia, à ma-
nuum gesticulatione, à præpropero incessu. Ut nihil in te
apparet, quod possit offendere intuentes; non sordes
vestium, non frontis rugæ, non motus incompositi, non
signa contemptū, seu animi abalienati, non quicquid
nauseam vel fastidium parit. Multa possunt honestè fieri,
quæ non possunt honestè videri.

5. Homo nudus creatus est & non erubescet; non
enim poterat rubore eum afficere nuditas ignorata. Post-
quam verò peccavit, abjectâ innocentiae chlamyde, quæ
satis eum tegebat, externa uestis pudori velando neces-
saria fuit. Sed quod olim in pœnam irrogatum fuit, nunc
in dignitatis prærogativam transivit. Quæruntur vesti-
menta, non quæ tegant, sed quæ ornent, quæ alienis
oculis ac libidini placeant. Index animi uestis est. Nimia
ejus accuratio, totusque vultus de speculo & capsulo mu-
liebris ingenii est. Pudebit cultus exterioris, si cogitaveris
quid eo tegatur. Qui habet intus ornamenta virtutum non
quærit externa. Ostentari virtus sine fuso gaudet, quic-
quid addideris minus est illâ. Vanus hominum error est
fulgere purpurâ, mente sordescere. Quidam se catenis
onerant, sed quia aureæ sunt, infamiam servitutis non
metuunt. Aliquos non ligat aurum sed figit, nam per vul-
nera infigitur auribus, è quibus sæpè patrimonia pendent,
& quæ olim pœnarum nomina, nunc ambitionis sunt.

Non paucos videbis inter pectinem & speculum diu occupatos, qui magis solliciti de capitis sui decore sunt, quam de salute. Ita prævaluerunt stultorum hominum depravata judicia, ut se rebus ornari putent, quas calcare deberent. Sit igitur vestis tua artis expers, non ad pompam, sed ad necessitatem, infra fastum, supra sordes & ad vitæ conditionem temperata. Auro te licet & magaritis exornes, sine Christi decore deformis es. Hic est decor qui semper manet, qui non carnem morituram, sed teipsum intus exornat. Insana ambitio est finum tegere auro.

CAP. XI. *De Custodia linguae. Quanti momenti sit & quam difficilis. Quid in sermone servandum, quid vitandum. Qualiter toleranda vitiosa aliorum lingua.*

1. **T**anti momenti est custodire linguam, ut majori curâ servanda sit, quam pupilla oculi, quia *mors & vita in manibus linguae*. Qui eam cohibere nequit urbi patenti absque murorum ambitu comparatur. Vix tamen domari potest sine speciali Dei auxilio. Domat homo leonem, domat taurum, doma tursum & non domat linguam suam. Innata est enim naturæ humanæ loquacitas, ut quod cupid & concipit statim proloqui gestiat. Tum lingua vicina est cerebro, os phantasie, ut quod illa cogitat, mox derivet ad os & in verba effluat. Docuit te natura quam sit necessaria linguæ custodia, cum duplex ei munimentum objecerit dentium & labiorum. Sicut autem odor unguenti pixidis ore non obstructo evanescit, ita patente oris januâ omnis animi vigor dissipatur. Malè sibi attendit, qui linguæ jugiter non attendit.

2. In omni locutione cautus esto, illam comprimens, immoderatam affectionem, quâ plerique impelluntur ad sententiam vix conceptam temerè effutiendam sine examine & delectu. Fuge duplicitatem & simulationem, sensusque animi absque involucre & ambiguitate purissime profer. Data est tibi à Deo loquendi facultas, ut eâ res sicuti sunt verè & candidè enuncies. Loquitur ipse

te consule, an ullus in te exæstuet affectio immoderata, nec quicquam linguæ permittas, donec commotio cesset: alioquin plura effundes, quæ te postea dixisse pœnitabit. Facilè silebis, si nulli perturbationum clamores in corde perstrepant: si fuerit in anima solitudo & serenitas. Non potest esse alius sermoni, alius animo color. Si mens sana est, si temperans, si composita; sermo quoque siccus ac sobrius erit. È vitiatâ, hic quoque afflatur. Cujus notæ quisque sit, indicium oratio est.

3. Nullus sit sermo otiosus. Sicut eligis quo vescaris, sic elige quod loquaris. Cibum per os ingressurum examinas, cur non verbum egressurum, quod sæpè in domo tua graviores tragœdias excitat, quam cibus in tuo stomacho? Affuesce plurimum tecum, minimum cum aliis loqui. Viros sapientes sæpè pœnituit locutos fuisse, nunquam vero tacuisse. Animalia quæ sapientiora censentur, parùm quoque vocalia sunt. Garrulitas vitium puerorum & mulierum est, quibus minus rationis inest. Nihil virtutis in eo est, è cuius ore non nisi vana & inutilia prodeunt. Si Deum amares, si tuæ salutis studiosus forès, omnia colloquia tua de Deo essent, de virtute & perfectione. Nescit amor mentiri, tegi non potest. Profunditur quisque in ea, quæ amat, quæ latent in mente frequentius ad linguam recurrent. Idèò minus libenter de rebus divinis loqueris, quia nondùm è fæce vitiorum emersisti. Accedit exigua lectio & meditatio eorum quæ pertinent ad salutem, ut etiam loqui volentem materia deficiat. Ex abundantia cordis os loquitur.

4. Omnis ferè sermocinatio in congressu hominum de aliorum vita, moribus & studiis est. Tot quisque judices habet, quot sunt capita in civitate. Vix ullus est, qui oculos domi habeat. Cæcutimus plerique in propriis vitiis discernendis, erga aliena acutissimi. Convitia in proximum plenis valvis admittimus, laudibus vix rimæ patent. Hoc vitium quo communius est, eo studiosius virandum. Satis tibi negotii cum vitiis tuis, ea carpe & emenda. Ar-

cana tua , sive aliorum quæ celare ex officio debes , nemini evulges . Plerosque contigit in perplexas incidisse quæstiones , quod imprudenter quibus non oportuit secreta crediderint . Sive uni , sive pluribus dixeris , idem est . Facilè sermo ab uno ad alterum effluit , ab hoc ad omnes . Oritur hæc facilitas ex hoc præcipue , quod cum plus justè protrahitur sermo , sensim irrexit dulcedo quædam confabulationis , non aliter afficiens animum quam ebrietas ; quare nullum secretum tam abditum & sacrum est , quod non erumpat . Ille tibi arcana sua aperit , ut veluti pignore fidei accepto tua vicissim illi communices . Sed tu forsitan audita retices , ille obvio cuique refert : & cum omnes palam ignorent , clam sciunt . Linguas dices per omnium aures secreto volitare , donec tandem arcanum superfluit , & rumor fit . Quicquid mali sub cœlo est aut lingua peperit , aut promovit . Ideò verbis tuis stateram fac & frænum ori tuo ; nihilque loquaris quod tacuisse melius sit . Laudabilior est verborum parsimonia , quam pecuniæ . Qui nummos prodigit , dum sibi nocet , aliis prodest ; verborum prodigus & sibi nocet & aliis . Ad divinitatem proprius accedit , qui multa audire scit & pauca loqui .

5. Nihil linguæ inaccessum . Non sunt immunes à criminationibus Principes terræ , quos extra ferri metum potentia collocavit : non viri sanctitate conspicui , quos censuræ subduxit innocentia . Ipse Christus , cum inter homines degeret , linguæ flagellum non evasit . Ad horum exempla erige patientiam tuam . Stimulus quidam virtutis est obtrectatio & frænum ne à recto tramite devies . Nullus capitalior vitiorum hostis , quam censura . Cum quis perperam de te loquitur , doceris quid caveas . Vis venenatæ linguæ morsus evadere ? comtemne . Nullum vulnus habebis , si tacueris plus tribuens bonorum judicio , quam criminantis insolentiae . Parùm refert quid alii de te sentiant . Est intus in anima testis certior & incorruptior . Conscientiam tuam interroga & illi crede . Quid turpius , quam ab insipientium sermone pendere &

propriam existimationem in aliorum judiciis reponere? Quicquid alii de te dicant, te oportet bonum esse: haud aliter quam si aurum vel smaragdus dicerent, quicquid alii dicant, me aurum esse, me smaragdum oportet & colorem meum servare. Si quis dulci ac limpido fonti convitum faciat, an propterea cessabit puram aquam scaturire? Et si quis lutum injiciat, nonne statim eluet ac dissipabit? Ita nec tu tranquillum animi statum turbare debes, et si mali te lacerent & calumnientur. Exigua sui æstimatio est ad omnem rumorem commoveri. Pueri os parentum feriunt, matris crines turbavit infans, momordit ubera, laceravit genas & sputo aspersit: & nihil horum contumeliam dicimus, quia qui fecit contemnere minimè potest. Quem itaque anlmum habent parentes adversùs pueros, eundem habe adversùs eos, qui te calumniantur. Si te semel eo dimiseris, ut injuriā movearis, eum qui fecit honorabis. Necesse est enim ut ab eo suspici gaudreas, à quo contemni molestè fers. Hoc autem est vitium ani- mi contrahenris se & descenderatis. Infelix semper eris, si te putas posse contemni.

CAP. XII. *De sensibus internis. Usus opinionum. Bonis cogitationibus mens imbuenda. De coercendo appetitus sensitivo, ejusque pravis affectionibus. Variae ad id preceptiones.*

I. **N**HOC PRÆCIPIUUS SAPIENTIÆ CARDO VERTITUR, UT NULLA opinio menti tuæ inseratur, quæ vel naturæ vel rationi inconsequens sit. Quare omnibus rejectis adversùs phantasiam motus exerceri debes, sicut Dialektici adversùs sophisticas captiones. Obiit filius. Non est hoc in nostra potestate, malum non est. Pater illum exhæredavit. Et hoc, cùm arbitrii nostri non sit, malum non est. At rem illam ægrè tulit. Hoc nostri arbitrii est, ideo malum fortiter tulit. Nostri arbitrii est & bonum. His si assueveris, proficies. Amicus in carcerem ductus est. Quid accidit? nihil, nisi quod in carcerem ductus est. De suo autem

quisque addit, malè cum illo actum esse. Corrige opinionem & omnia tranquilla sunt. Sicut furiosum ligamus, ne cui noceat: ita coercenda phantasia, ne falsis opinioribus obruat mentem. Hæc tanquam fera indomita propicit sese & quocunque libuerit per summam licentiam divagatur, garrula, fugax, quietis impatiens, novitate rerum lætissima, nec agnoscens moderationem. Huic igitur studio sedulam operam navare debes, ut eam teneas & alliges, ac in uno figas, ne cogitationes tuæ, animique decreta semper ex opinione suspensa sint. Quæcumque sunt extra animum tuum, nihil pertinent ad te.

2. **Q**uicquid se tibi cogitandum offert examina diligenter, quo tecum ipse differere possis, quæ sit ejus rei nudæ, & ab omnibus aliis separatae natura, quæ proprietates, quis finis, quæ circumstantiæ, quæ utilitas: an ad te spectet, sitque in tua potestate, nec ne: alioquin nullum ei accessum præbeas, eique repugna, quantum potes. Deus intimè præsens occultissima cordis tui clarissimè perspicit, nihilque tam abditum est, quod oculis ejus pervium non sit. Vide, ne coram ipso ea volvas in mente, quæ coram honesto viro loqui erubesceres. Sint cogitationes tuæ placidæ, simplices, puræ, omnisque malitiæ expertes. Tales sint, ut subito interrogatus quid cogites, possis sine pudore palam facere quod intus latet in corde. Pudeat cogitare, quod pudet loqui. Malis cogitationibus aditum obstrues, si bonis semper occuperis.

3. Nihil æquè noxiū animæ, nihil magis contrarium quam inferior, brutalis & sensitivus appetitus. Hic fons est omnium scelerum & imperfectionum; hic hostis quem semper timere, semper impugnare debes, donec rationis imperio, quantum in hac vita fieri potest, subjiciatur. Nulla hinc tequies, nullum otium datur. Sine fine & sine modo pugnandum, quia nec finem, nec modum adversarius habet. Latet hic intra te, imo tu ipse tibi hostis es, potentior quam Xerxis exercitus. Custodi à te ipso animam tuam. Fortius est te invadere, quam urbes;

tui potiri, quām retum. Non exigo ut pravas affectiones omnino conteras & ad nihilum redigas; sed ut eas regere discas. Satis præstiterit ratio, si eas compescat & moderetur. Iniqui fuere Stoici, qui omnes affectus tanquam malos infamarunt. Mala non est, nec supervacua supellex naturæ. Tollit omnem virtutem, qui omnes tollit affectiones. Nullæ sunt victoriae, ubi nullum certamen.

4. Difficilis sanè hæc lucta est & prælium anceps: affectus enim nascuntur nobiscum & ratio multis post annis subsequitur, quando illi jam dominantur & voluntas sine repugnantia eis paret specie boni inaniter delusa: donec ratio successu temporis & experientiâ instauratis viribus suum agnoscat dominandi jus & affectum tyrannidi obſtare incipiat: & primi quidem naturæ motus inemendabiles sunt; sed attendere tibi ipſi summa vigilantiâ debes & cùm primùm te perturbari animadvertis, tunc ratione quasi fræno eam commotionem coërcere. Facilius est initii resistere, quām impetum gubernare. Brévi tempore ad magnam animi tranquillitatem pervenies, si casus omnes circumspexeris, antequam eveniant, ut te paratum hostis aggrediat. Serò animus ad remedia post pericula instruitur. Tum pauca agere & loqui disce; nam si ex his, quæ plurima loqueris & facis, ea tollas quæ necessaria non sunt, pauciores senties animi perturbationes. Neque dicas, hoc parum est, hoc nihil refert. Maximum enim est, licet minimum videatur, quod est initium virtutis & perfectionis.

5. Homo vetus à peccatoris Adæ infecto semine trahens originem, si quasi quædam arbor consideretur, habet pro radice amorem sui, pro trunko propensionem ad malum, pro ramis perturbationes, pro foliis vitiosos habitus, pro fructibus opera, verba & cogitationes, quæ divinæ legi adversantur. Ne igitur rami pravarum affectionum in folia & fructus erumpant, pone securim ad radicem & pessimum tui ipsius amorem extirpa. Si hunc sustuleris, omnem inferioris appetitus vitiosam sobolem

unico i^ctū excidisti. Tolles autem & eradicabis, si te ipsū sum spreveris: si verè credideris te unum esse ex milibus, nullā dote singulari præditum, omniq[ue] scientiā & virtute destitutum: si displicere hominibus & ab illis sperni non metuas: si omni solatio & commodo libenter careas. Servabis te, si benē oderis: perdes, si male amaveris.

C A P. XIII. *De Amore. Quæ sit ejus natura, quæ causæ, qui effectus. De ejusdem remedio. Addita quadam de Odio.*

I. **A**MOR complacentia boni est, illa scilicet prima impressio, quā afficitur appetitus, dum bonum cognitum ei placet. Hoc cohæret universus orbis, eoque subacto, qui primū inter affectus locum tenet, facile reliqua turba debellabitur. Bonus amor illuc tendit, unde sumpsit originem: ad bonum accedit, quia à summo bono procedit. Discute vitam tuam & in statera districti examinis appende cor tuum. Observa quis in eo prævaleat amor: id enim quod in lance dilectionis præponderat, hoc tibi Deus est, hoc idolum quod colis. Ideo præcepit Deus, ut eum toto corde diligeres, præoccupare cupiens tuæ mentis affectus, quia quod diligis ex toto corde, hoc tanquam Deum adoras,

2. Impellunt ad amandum, præter bonitatem & pulchritudinem, sympathia quædam & convenientia morum & animorum: modestia item exterior, industria, nobilitas, doctrina, ingenii perspicacia & alia ejusdem generis corporis & animi ornamenta. Ipse amor magnes amoris est, cui si accedant beneficia, jam cogitur dilectionem rendere, qui nolebat impendere: sunt & quædam naturaliter ad amandum provocantia; nam quibus spiritus lucidiores sunt, cor calidius, subtilior sanguis, quique sunt facili ac miti naturā, ad amorem sunt procli viores.

3. Magna est amoris potentia, in rem amatam transformat amantem. Quidam sui exitus amor est, quædam à se peregrinatio, quædam spontanea mors. A se ab est omnis

omnis qui amat, nihil cogitat de se, nihil providet, nihil agit: & nisi ab amato suscipiatur, nullibi est. O quām infelicitatē amat, qui Deum non amat! Non enim potest in amato esse, qui diligit terrena, quæ animam satiare nequeunt, cum sint finita, & vanitati ac morti subjecta. Qui verō Deum diligit in Deo est, & desinens vivere in se, in eo vivit, in quo omnia vivunt, qui est centrum nostrum, & incommutabile bonum. Amor humanus violentus, & amarus est; divinus semper humilis, & tranquillus: illum cruciat zelotypia, in hoc nulla rivalitas est: ille timet ne alius amet, hic optat ut omnes ament. Ergo si te amas, Deum ama: nam quod ames, prodest tibi, non illi. Homo mutari potest, & perire: Deum nunquam amittis, nisi dimittis:

4. Ut amor, quo socium fortè prosequeris, sincerus sit; omnes ab eo humanas causas ingenii, jucunditatis, similitudinis remove, & illas dumtaxat quāre, quæ in pietate & sanctitate consistunt. Pernicies virtutis est amor, quem Platonicum vocant, quo à formæ corporalis aspectu animam erigi singunt ad divinæ pulchritudinis considerationem. Formosæ faciei obtutus ad tangendi concupiscentiam excitat; & quod per oculos exit, sive lumen sit, sive fluxus quidam, hominem colliquat & perdit. Melius est labi pedibus, quām oculis. Sunt autem difficillima amoris remedia, quia castigatus magis premit; & nisi obstes principiis, ita sensim irrepit, ut te prius amare sentias, quām instituas de amando consilium. Sed si omnino initisi repugnes, facilis curatio erit. Alijs quoque rebus occupanda mens, quæ curas ingerant, & memoriam rei amatæ dimoveant. Tum vitanda omnis admonitio dilecti corporis, quia nihil facilius recrudescit quām amor, qui si semel te invaserit, adeò pertinaciter vexabit, ut non nisi lento remedio temporis, & absentia submoveti queat, donec scilicet lassus expiret. Multos curavit pudor, dum se dígito signari, vulgique fabulam fieri doluerunt; & rei fœditatem plenam dedecore, plenam periculis, & pœnitentiæ obnoxiam considerarunt,

C. Bona Opusc. Spirit.

Y

Aliis profuit attentè disquirere mala , & incommoda rei amatae, quæ ejus decorem , & amabilitatem imminuerunt. Demum juvabit amorem ad Deum , ad virtutem , ad æterna præmia , ad ea nimium , quæ verè amabilia sunt , convertere , ut bonus amor malum pellat amorem , & mens hominis generosa vilissimo terræ amore fordescere erubescat. Mali amores bonos mores inficiunt.

5. Omnia colligavit natura amatoriâ quâdam catenâ. Hæc cogit & copulat stellarum choreas in cœlo , volucrum examina in aëre, armenta boum in pratis , greges pecudum in montibus , turmas ferarum in sylvis. Sacer autem hic nexus à solo rumpitur odio ; ut enim amor ad unionem , ita odium ad divisionem & dissensionem tendit. Hujic affectui facilè subjacent ignavi , timidi , & suspiciosi , qui undecunque damnum metuunt. Sunt & quidam homines ita nati , ut oderint omnes , qui tanquam diræ alites , tenebras quoque suas exosas habent. Si quis hujus notæ occurrerit tibi ; non odio illum , sed miseratione prosequere. Si eut in palæstra caves à collusore placide & sine ira : ita in omni vita ab eo sine odio declina , qui tibi contrarius est. Odium verò compescet excitando animum ad amorem per considerationem alicujus boni in eo quod odio habetur. Nullus in te odio locus erit , si omnia in bonum interpreteris. Tum applicandum est odium ad ea , quæ verè illud merentur , quæ sunt deformitas peccati , & æterna damnatio. Si ad alia ipsum vertis , non rem quam odisti , sed te ipsum laedis , & perdis. Nam si etiam inimicos juberis diligere , quem debes odire ? Abeundum est tibi extrarum municipium , ut invenias quem odire liceat. Extrarerum naturam malum est , in quod solum justè exerceri odium potest. Quod si hominem odire debes neminem ita ut te ? nemo enim tantum tibi nocuit , quantum tu ipse.

CAP. XIV. *De desiderio , & fuga. Quid desiderandum , quid fugiendum sit.*

1. **F**elix est qui subiectus est Deo , qui nihil impense desiderat , qui se rebus accommodat , quidicit ; Vult me Deus

incolumem esse, vult me ægrotare? vult me divitem, vel pauperem? vult me hinc migrare, vel hîc morari? Ad utrumque paratus sum. Si semel dixeris, Quando illuc ibo? quando illud habebo; misereris. Nam si id concupiscis quod extra te est, perpetuâ anxietate cruciaberis, & tanquam in orbiculari machina semper sequeris, nunquam assequeris. In tua potestate sunt opiniones, cogitationes, affectiones, & quælibet actiones tuæ: extra eam corpus, divitiae, gloria, dignitates, & quicquid ipse non agis. Illa nec prohiberi ab aliquo, nec impediri possunt: hæc aliena sunt, & impedimentis obnoxia: quare ea omnino non appetes, vel ita saltem ut scias ab aliorum arbitrio pendere, & diu tecum esse non posse, quia sic exigit eorum conditio. Nulla res externa desiderabilis est, *Præterit enim figuræ hujus mundi.* Etsi omnia votis respondeant, quicquid habueris dolens & invitus in morte relinques. Intro respice: intus est fons boni, semper scaturiens, si semper fodias.

2. In hoc uno posita fuit quoruindam veterum Philosophorum sapientia, qui fortunæ imperio exempti inter ipsos corporis acerrimos cruciatus litem beatis mentibus de felicitate movebant. Nam cum terminos potestatis homini à Deo concessæ contemplarentur, sibi planè persuadebant nihil præter affectiones & cogitationes suas ad se pertinere. Ideoque tam absolutum in eas imperium hujus meditationis usu acquirebant, atque ita animi motus regabant, ut non sine aliqua ratione se solos divites, solos potentes, solos felices jaçtarent. Assidua autem exercitatio necessaria est, ut res extra te positas tanquam nihil ad te spectantes spernere diseas. Id si fueris assequutus, nunquam dolebis externa tibi deesse, sicut non doles, quòd rex Tartarorum non sis, aut quòd alis careas ad volandum. Quæ extra nos, nihil ad nos.

3. Hoc fræno coercenda sunt desideria, quibus si modum non imponas, nunquam explebitur inexplebilis animus, & quicquid illi congesseris, non erit finis cupiditatis, sed gradus, & irritatio. Nullus humor sufficit ei, cu-

lus viscera ardenti æstu laborant: non enim sitis illa, sed morbus est. Ita accidit illis, qui desideria sua non ad rationem revocant, cuius certi sunt fines, sed ad vitium & luxum, quorum immensum est, & incomprehensibile arbitrium. Nulla incommoda senties, nec quidpiam tibi derit quod desideres, si te intra naturalem modum continebis: si modum excesseris, etiam in summis opibus pauper eris. Cupiditati nihil est satis, naturæ pauca sufficiunt.

4. Memento sic in vita versandum esse, ut in convivio. Si quæ epulæ circumferantur, & ad te pervenerint manu modeste extentâ partem accipito. Si te prætereat, qui fert, ne eum detine. Si nondum pervenerit, ne longè appetitum extendas, sed expecta donec accedat. Sic erga divitias, erga dignitates, & reliqua quæ extra sunt, si affectus fueris, dignus eris Sanctorum convivio, eaque animi serenitate frueris, quæ te omnibus casibus superiorem faciet. Quod si ea quæ oblata fuerint despixeris, & recusaveris; non solum conviva Sanctorum, sed consors eris felicitatis eorum, eamque incipies prægustare in terra, quâ illi in cœlo perfruuntur. Arbitrio tuo potes te beatum facere, si nihil desideres, quod extra te sit. Quis est beatus? qui habet quicquid vult. Habet autem quicquid vult, qui non vult nisi quod potest.

5. Multa fugimus, & abominamur tanquam noxia & adversa, quæ revera utilia sunt. Fit enim plerumque ut spiritui plurimum profint, quæ appetitui adversantur. Quæ nocent, docent. Mors, exilium, paupertas, ignominia, labor, ægritudo, & cætera ejusdem generis, quæ in tua potestate non sunt, nec mala sunt, nec pertinent ad te. His itaque non fugam, non abominationem opponere debes, sed conceptæ de illis opinionis neglectum. Hæc omnia Socrates larvas appositiè nuncupabat. Nam ut pueris larvæ incutient metum, cum nihil in illis præter externam speciem horribile sit: ita in rebus contingit, quas non ut sunt, sed ut apparent apprehendere soles. Mors

quid est ? Larva. Vide quām dulcis fuerit non solum
sanctis , & eximiā virtute præditis viris , sed Socrati , &
aliis sapientibus Ethniciis. Quid igitur terribile est in mor-
te ? Opinio. Timor mortis est horribilis , non ipsa mors.
Idem in aliis rebus , quas soles abominari , apprehen-
des. Corrige opinionem , & nihil invenies quod debeas
abominari præter peccatum.

C A P . X V . *De Gaudio , & Tristitia . Qualiter vir bonus
gaudere debeat . Non tristatur qui omnia prævidet .*

Varia doloris antidota .

1. **I**Ta gaudere debes , ut in gaudio tuo modestia elu-
ceat ; neque animus ita dissolvatur , quin possis libere ,
si opus sit , à lætitia ad mœrorem transfire. Christus Do-
minus optimus rerum æstimator non ridentes beatos vo-
cat , sed eos qui lugent. Valdè enim dedecet Christianum
hominem , qui se æterna sectari profitetur , inter
tot pericula mentis & corporis , inter tot justissimas tri-
stitiæ causas , stultorum more risu gestire , & de rebus pe-
rituris exultare. Fugit terrena voluptas , & quæ nos gau-
dia vocamus , sèpè initia tristitiæ sunt. Verum gaudium
non nisi ex virtutum conscientia nascitur. Non potest gau-
dere nisi justus , fortis , & temperans. Ut nunquam desit
animo tuo lætitia , fac ut tibi domi nascatur. Nasceret
autem , si intra te ipsum fuerit. Cæteræ hilaritates leves
sunt , non implet pectus ; nec semper gaudet , qui ridet.
Res severa est verum gaudium , oritur ex bona conscienc-
ia , & honestis consiliis , & rectis actionibus , ex con-
temptu voluptatum , & placido illibatae vitæ tenore. Hæc
est vera virtutis lex , ut vere gaudeas , diu lugendum.

2. Tristitia malum præsens vel reipsâ , vel apprehe-
sione cum quadam perturbatione & inquietudine execra-
tur. Solemus autem ut plurimùm non rebus , sed rerum
opinionibus cruciari. Noli res indagare quales sint , non
servitia , non agros , non nummos , non negotia : con-
sidera potius quæ tua de illis opinio sit. Quòd dede-

Y iii

core afficiaris, quod spolieris pecuniā, quod vapules arbitrii tui non est: at recte de his sentire, non ea esse mala sed sēpē utilia, penes te est. Nunquam stoledis, si à præfenti molestia avulsam cogitationem illuc converteris, ubi vera sunt gaudia. Viro bono nihil accidit mali, non quia non sentiat, sed quia vincit. Respicit enim omnem adversitatem ut occasionem exercendi patientiam, ut instrumentum divinæ gratiæ, ut viam ad gloriam in æternum duraturam. Potest vir bonus miser dici, esse non potest.

3. Quicquid fieri potest, quasi futurum prospice. Sic omnium malorum impetum mollies, quæ ad præparatos nihil afferunt novi; securis & omnia prospera expectantibus gravia eveniunt. Quid erit si rerum tuarum dimidium auferat casus? quid si omnia? quid si ruat domus, comburantur segetes, deserant amici? quid si fama periclitetur, & de gradu per calumniam dejiciari? Morbus, captivitas, ruina, ignis, nihil horum sapienti repentinum est. Futuras secum commentatur miserias, & dolorem quem alii diu sustinendo, ipse diu meditando lenit. Cuivis accidere potest, quod alicui accidit. Quæ sunt divitiæ, quas non fames à tergo, & mendicitas sequuntur? Quæ dignitas, quam non sordes comitentur & extrema contemptio? Quod regnum, cui non sit paratum excidium? Nonnè gladio carnificis regiam cervicem abscessam, idque jussu subditorum, inaudito exemplo hæc artas vidit? Nec magnis ista intervallis divisa sunt: horæ momentum interest inter opes & egestatem, inter aulam & caulam, inter solium & securim. Scito ergo omnem conditionem versabilem esse, & quicquid in ullum incurrit, in te quoque incurrere posse. Adversam fortunam facile sustinet, qui semper expectat.

4. Non se exerit virtus, cùm secundo cursu vita procedit. Tunc apparet quanta sit, cùm quid possit patientia ostendit. *Spectaculum*, inquit Apostolus, *facti sumus Deo, Angelis & hominibus*. Ecce autem spectaculum dignum, ad

quod respiciat intentus operi suo Deus: Ecce par Deo dignum, vir fortis cum adversitate compositus, de seipso, & de omni calamitate triumphans. Tranquillum mare & ventus obsequens artem gubernatoris non ostendunt. *Qui non est tentatus, quid scit?* Dicit aliquis infelicem me, cui hoc acciderit. Imò felicem te: quia licuit tibi te experiri. Potuit enim tale quidpiam cuique accidere, sed non erat cujusque similem casum sine dolore excipere. Ne itaque in sinistris eventibus te submiseris: contra potius fige stabilem gradum, & quicquid oneris supra cedit, sustine. Nam primo impetu fracto nihil in his horribile esse videbis præter opinionem, *Quæ à natura vim habent, eamdem servant in omnibus: sed paupertatem, ignominiam, contumelias, & cætera, quæ mala vulgus nuncupat, multi patienter ferunt, multi nec sentiunt quidem: non ergò naturale est in his mœrore consumi, sed à perversa opinione procedit.* *Quid tibi ipsi mentiris?* Levem omnem calamitatem ferendo facere potes. Levis est omnis dolor, si nihil ei opinio adjecerit. Noli mala tua facere tibi per impatientiam graviora. Tam miser quisque est, quam se ipse existimat.

5. Omnis ægritudo morâ tandem decrescit, & licet contumacissimum dolorem, tempus adimit, & enervat. Visnè igitur diem opperiri, quo luctus te invito desinat; an ipse illi finem imponere? Cur non id consilio præripis, quod allatura est diuturnitas? Quamvis ipse custodias mœrorem tuum, custodienti tamen elabitur. Nulla enim res citius in odium venit, quam tristitia; quæ dum recens est, consolatorem invenit, inveterata deridetur. Quod si dolore calamitas vincitur; eat omnis inter luctus dies, noctem sine somno mœstitia consumat, ingerrantur pectori manus, & sese omni sævitiae genere profecturus dolor exerceat. Sed si lacrymæ inutiles sunt, si nullo fletu adversitas mitigatur, disce te ipsum regere, & omni adversitati invictâ constantiâ obfiste. Turpis est navigii rector, cui gubernacula fluctus eripuit, qui fluctuan-

Y iiii

tem navim tempestati permisit. At ille vel in naufragio laudabandus, quem obruit mare clavum tenentem, & undis reluctantem.

CAP. XVI. *De Spe, & Desperatione. Quomodo utramque moderari oporteat.*

1. **S**pes vana, & mendax, & verè somnium vigilantis est, nisi in Deo collocetur, cuius solo nutu omnis difficultas vinci potest. Quid rei futuræ expectatione cruciaris, & in longinqua cogitationes extendis? Nihil sperabis si nihil cupies, si omnia terræna despicies. Nemo sperat quæ contemnit. Licet te nunquam sperata deceperint, licet non ex diffcili petatur quod speras, quamdiu te spes aliqua proritat, sollicitus eris, & incertus tui, ac in ancipiti positus. Ut pedibus loca invia, & prærupta non petis; ita nec animo ea speranda quæ in tua potestate non sunt. Omne miseriæ momentum hoc est, defuisse voluntati quod speravit.

2. Sæpè admonendus est animus, ut quæcumque extra te, & circa te sunt, aspiciat ut peritura, tenuique filo pendentia. Quid oblivisceris conditionis tuæ? Mortalis natus es: nihil tibi de hodierna die promittitur, nihil de hac hora. Instat à tergo mors: quicquid habes mutuo acceptisti. Ususfructus tuus est, cuius tempora summus omnium arbiter temperat. Ad ejus nutum omnia sine quælla reddenda sunt. Pessimi est debitoris creditorì convitium facere. Nihil est ergò sub sole quod debeas aut possis sperare. Illa tantum vera est spes, quæ de vero, & summo bono ritè concipitur.

3. Desperationem causant inertia, abjectio animi, nimia difficultatum apprehensio, virtiosa sui diffidentia, viriumque & industriæ defectus. Vincitur excitando animum eorum exemplo qui etiam in gravioribus augstiis constituti omnia obstantiæ generosè superarunt. Incipe, & propelle te ipsum, quia Deus facientes adjuvat, & quod arduum videbatur, facillimum sit, si falsa de illo

opinio deponatur. Quicquid accedit tibi, id omne ab æterno destinatum est. Illud autem aut ita evenit ut natura comparatus es ferre, aut secus: si primum, ne despera, sed fer: sin aliter: nec tunc quidem desperandum; quicquid enim illud est, citò finem & ipsum habebit, & tibi imponet. Leve est, quod ferre potes; breve, quod non potes. Sed memineris in te situm esse multa facere tolerabilia, si ea ut utilia, & convenientia apprehenderis. Calamitas virtutis occasio est.

C A P. X V I I. *De Timore. Quām vanus sit & quā ratione vincatur. Audacia vitanda. Quædam iterum de Ira.*

1. **M**Agna pars mortalium, cùm nec sit quicquam mali, nec pro certo futurum sit; æstuat tamen, & discurrit, sibique infortunium vel singit vel auget. Non tot reperit cruciatus humana crudelitas, quot patitur animus futuri anxius, qui sollicitus est ne bona præsentia amittat, aut mala imminentia eveniant. Multa mala quæ non essent, sunt quia timemus. Quid prodest tibi ante tempus cruciari, & inani providentiâ occurrere ærumnis tuis? An ideo oportet te jam miserum esse, quia quandoque futurus es? Stultum est dare se referentibus, nullisque apparentibus signis quæ malum prænuncient, falsis terreri imaginibus. Sæpè fallaci conjectura deceptus verbum dubiæ significationis detorques in pejus. Sæpè potentis offensam majorem putas, quam revera sit; & cogitas, non quantum iratus sit ille, sed quantum liceat irato. Vani autem sunt hi metus, & ideo magis perturbant, quia vani sunt. Vera enim modum suum habent, quicquid ex incerto venit, conjecturæ & licentia paventis animi traditur. Parum differt patiaris adversa, an expectes; nisi quod modus est dolendi, non est timendi. Doles quantum scis accidisse, times quantum potest accidere.

2. Si vis omnem timorem exuere, quicquid vereris ne eveniat, eventurum propone & illud malum tecum metire, metumque tuum taxa; intelliges profecto non re ip-

sâ sed opinione magna esse quod metuis. Num potest aliquid tibi durius accidere, quàm ut mittaris in exilium, ut ducaris in carcerem? Num quidpiam corpori ultrâ timendum est, quàm ne uratur & pereat? Excute singula ista & redige ad verum timorem tuum; multos invenies, etiam infideles, qui hæc omnia contempserunt. Stephanus inter lapides pacato animo Deum precatur: Laurentius in flammis exultat & insultat tyranno: se ultrò projectit in succensum rogam Apollonia Virgo. Ridet ferreis malleis contusus in pila Anaxarchus: Socrates cicutæ poculum gaudens exhaustus & Critiæ propinat. Quid ignes metuis & turbam carnificum circa te frementium? sub ista pompa, quæ stultos territat, latet mors, quam tot pueri, tot puellæ læto animo amplexi sunt. Deme rebus tumultum, deme personam, redde singulis faciem suam: nihil in illis terribile esse videbis, præter ipsum timorem. Id nobis evenit grandioribus pueris, quod parvulis solet. Hi quos amant, quibus assueverunt, cum quibus ludunt; si personatos vident, expavescunt. Tu verò pueris deterior ad tantam ineptiam pervenisti, ut non solùm dolore, sed doloris laryâ & panico terrore vexeris.

3. Abduc animum à privata causa ad communem. Dic mortale tibi & fragile corpusculum esse, multisque morbis, ac tandem morti obnoxium. Dic tibi ipsi: Jam prius sciebam multa mihi adversa imminere. Quid nunc ergò timeo? Ægrotabo? Proderit ad animæ salutem corporis ægritudo. Ad paupertatem redigar? tutior mihi & tranquillior vita erit. Opes amittam? & cum illis curas multas, periculumque perpetuum. Ignominia afficiar? si justa, ejus causam execrabor: si injusta, meâ me conscientiâ consolabor. Repulsam speratæ rei patiar? Nec reges quidem omnia quæ cupiunt assequuntur. In exilium mittar? Sponte ibo, eritque peregrinatio. Cæcus siam? Multis cupiditatibus via incidetur. Male de me loquentur homines? Facient quod mereor, quod solent. Moriar? Hâc conditione intravi, ut exirem. Sed peregre moriar?

Nulla terra est aliena non habenti hīc permanentem civitatem. Moriar ante diem? Nemo nisi amens queritur ante tempus absolvī vinculis & carcere relaxari. Mors, exilium, luctus non sunt supplicia metuenda, sed tributa nostræ mortalitatis. Stultum est ea timere, quæ vitare non potes.

4. Fuge audaciam, nihilque temerè ultra vires aggredere; nemo enim celerius opprimitur, quam qui nimium de se præsumit. Exiguæ sunt vires nostræ sine Dei præsidio, à quo omnis sufficientia, omne robur emanat. Oritur audacia à propriæ virtutis nimia existimatione, à contemptu adversariorum, à præcipiti ingenio, rebusque gerendis minus exercitato. Plus metuit, qui prudentior est; nam vires proprias metitur, solerter prospiciens quid valeant, quid ferre recusent. Audaces, cùm graviora quam antè conceperant experti pericula fuerint effuso primo impetu subsidunt & torpent, serò agnoscentes quam sint incertæ hominum providentiæ, quam vanæ cogitationes. Initiū est futuræ calamitatis incauta securitas.

5. Nunquam tui dominabitur ira, si opinionem existimatę injuriæ tollas. Tu ipse dux flagitiorum tibi es & incensor criminum: tu mala omnia tibi struis. Quid causam tuarum perturbationum in alios derivas, si tu te impellis & præcipitas? Nemo læditur nisi à seipso. Quid dicunt pueris nutrices, si non plores, accipies; id tu rectius dices animo tuo effervescenti: Noli irasci, noli urgere & clamare, rectius fiet quod volebas. Dies quosdam institue, quibus proponas in iram nunquam incidere quacumque ex causa: tum per unum vel duos menses eadem ratione experire, invenies successu temporis te adeò profecisse, ut ad risum te provocent, quæ prius iratum è statu mentis dejiciebant. Placi*di* mores nemini eorum, cum quibus vivitur, ita sunt grati & jucundi, ut ei ipsi qui prædictus illis est. Hoc boni habet pacatus animus, semper gaudet, semper triumphat.

CAP. XVIII. *De potentius animæ rationalis. Continens intellectus à curiositate. Cui potissimum scientiae incumbendum. Quād malum sit aliorum mores disquirere. Aliorum judicia spernenda. De voluntatis abnegatione.*

I. **D**ata est tibi à Deo intelligendi facultas, ut ipsum agnosceres & cognoscendo amares; sed per peccatum duplii vulnere sauciata est, ignorantia & cætitate. Nam & in notione veritatis erras & quid sit faciendum, vel fugiendum plerumque ignoras. Quantâ ergo diligentia vel urbs in grassantis pestilentia metu, vel arx ab hostili exercitu obsessa custoditur, ne quis non planè cognitus intus obrepat: tanta est cura, multoque majori vigilandum, ne intellectus malæ rei sibi à sensibus objectæ aditum patefaciat. Rerum enim species sensus objiciunt, intellectus admittit & ad judicium defert, hoc voluntati proponit. Sed sensus offerunt bona & mala, mentis est vel admittere, vel excludere.

2. In primis continendus est intellectus à curiositate. Cur per inania distrahis mentem solidæ sapientiae & Deo natam? Res frugi sapientia est. Sicut qui gustat aconitum, ut qualitatem ejus scrutetur, prius perit, quād saporem sentiat: sic qui ea rimantur, quæ ad se non spectant, prius seipso pessimadant, quād cognoverint quod quærebant. Scire quod non prodest, proximum est ignorantiae. Qui verè sapiens esse cupit, non opinioni discit, sed vitae: nec quærit in scientiâ oblectamentum animi, sed remedium. Nolle gaudes stellarum vires? Inepties postquam sciveris, si ignores infirmitatem tuam. Vis ornatè & eleganter loqui? Satiūs est si discas tacere. Scire nova cupis? Quid magis novum, quād renovare te ipsum? Hoc dilce. Errores alienos liber confutare? Cur non corrigis tuos? Juvat percurrere historias & scire aliorum facta? Benè, si interim non ignores, quæ à te sunt facienda. Placita litigantium concordare delectat? cur non & tuos affectus tumultuantes? Nisi quæreres supervacua,

facile invenires necessaria. Scientia autem necessaria illa est , quæ te bonum potius , quam doctum facit.

3. Quid in iis quæstionibus te torques & maceras , quas subtilius sæpè est contempñisse , quam solvere ? Cur pertinaci studio laboras , ut ea discas , quæ forent dedicenda si scires ? sed ut aliarum rerum , sic quoque literarum intemperantia nos vexat. Nullus librorum est finis. Instruuntur Bibliothecæ ad spectaculum potius & ornatum , quam ad usum legentium. Vix librorum editorum indices totâ vitâ legere poteris , quamvis multos vixeris annos. Inter hos multi sunt noxii & perniciosi : multi indigni qui legantur , multi vani & imperiti , quos cùm diù perlegeris , nihil scies. Plures quidem à limine salutare tibi permittitur , ne aliquid in ipsis latere judices magni & secreti boni ; sed paucis & cum delectu insistendum. Paucis ad bonam mentem libris & literis indigemus.

4. O inanes mortalium cogitationes ! Impallescimus chartis & per innumeræ artes ac scientias ingenium extendimus , quasi nobis per multa sæcula vivendum sit : vitæ verò sempiternæ curam negligimus , quæ non scientiis sed virtutibus comparatur. Quid prodest acta exterorum Regum inquirere & quæ passi invicem , ausique sunt populi , magnis voluminibus describere ? Quantò satius foret tua mala extinguere , quam aliena posteris tradere. Docet te Geometria metiri latifundia ; doceat potius quomodò quod tibi sufficiat metiari. Numerare docet Arithmeticæ & avaritiæ commodare digitos : doceat potius ea spernere & læto animo amittere , quæ tantâ solicitudine computantur. Monstrat Musica quomodò voces inter se consonent : ostendat potius quomodò secum mens concordet , nec disparem reddant sonum sensus & ratio. Monstrat qui sint modi hilares , qui flebiles : ostendat inter prospera non extolli , inter adversa non emittere flebilem vocem. Non damno harum rerum cognitionem ; sed hæc & alia utiliter scies , postquam sciveris te ipsum &

novissima tua. Nihil scis, quamvis omnia scias, si te ipsum ignoras.

5. Infame vitium ac sordidissimum est aliena facta observare, mores disquirere & omnia temerè interpretari. Quis enim es tu, qui alienum judicas servum? *Domino suo stat, aut cadit.* Ipse est qui judicat omnes, qui omnem sibi judicium reservavit. Quâ audaciâ divinum tribunal præsumis in vadere? Attende tibi & latebras conscientiæ tuæ perscrutare. Vide ibi mala quæ insunt, bona quæ desunt & noli oculos ad aliorum vitam convertere. Satis überem malorum copiam in te reperies, quam acriori censurâ perstringas. Vix quidpiam justè fit, quod non possit pravum ingenium in malum detorquere. Ipsiſ E-vangeliis abutuntur hæretici: Christi actiones calumniantur Hebræi. Ut corpora melancholica & mali humoris, quicquid cibi sumplerint in bilem vertunt: sic anima male disposita quicquid videt, quicquid audit perperam interpretatur. Bona vel mala intentio sæpè res bonas vel malas fecit: hæc autem soli Deo nota est, qui scrutatur renes & corda. Quid si factum alienum nullâ potest ratione defendi, quid ad te? Non erubescis fædissima quæque quasi è latibulis educere ac publicè spectanda proferre: Cur non te ipsum observes, qui cæteris deterior es? In te exerce maledicentiam tuam, de te ipso tecum detrahe, accusa pravitatem tuam & te ipsum dijudica. Dei enim judicium evades, si tui judex severus fueris.

6. Ut ingeniosi in notandis aliorum factis plerique sumus, indè nobis prudentiæ famam perquirentes; ita facilè suspicamur alios de nobis male sentire, vel loqui; nos illis odiosos esse & despicatos. Hoc vitium ut repellas, temperanda primò cupiditas est, quâ hominibus placere, & magni ab illis æstimari desideras. Tum danda est opera, ut vel ipsam cogitationem abjicias sciendi quid alii de te sentiant, vel loquantur: cum præsertim sæpè contingat eos nec quidem de te cogitare, quos singis perperam de te loqui, & te observare. Dic tibi cum Apo-

Ito. *Si hominibus placerem, Christi servus non essem. Dic ad alios, Mibi pro minimo est, ut à vobis judicer, aut ab humano die. Talis reverè es, qualis es apud Deum. Sensus & loquela hominum nihil adjicit bonitati tuæ, nihil detrahit de malitia. Melius est bonum esse, quam videri.*

7. *Nihil tuæ voluntati contrarium eveniet, si eam penitus abnegaveris, & transfuderis in divinam. Sic mentis solidâ pace, sic verâ tranquillitate perfrueris. Vives ut voles, si quid velle debeas didiceris. Debes autem velle quod Deus vult. Hæc est unica vitæ hujus felicitas, velle ut quæ sunt ita fiant, sicut vult Deus, non ut volumus ipsi. Dicit te Deus ad finem, ad quem ab æterno destinatus es, per suavia & aspera, per prospera & adversa. Obsequere divinæ providentiæ, & sequere alacriter: nam et si repugnaveris, sequeris nihilominus, & impius eris. Dicit volentem Deus, nolentem trahit.*

CAP. XXI. De Statu Proficientium. Varia profectus adjuventia. Temporis aestimatio & usus. Dei præsentia necessaria.

1. **S**i bonus esse cupis, primùm credito te malum esse. Nunquam proficies, si proficiendi deposueris appetitum. Nolle proficere, deficere est. Persevera igitur ut cœpisti, & quantūm potes propera, quo citius frui emendato animo & composito possis. Argumentum animi in melius translati, est si vitia tuavides, quæ adhuc ignorabas. Sic ægris gratulari solemus, cum se ægros esse senserunt. Noli facile tibi credere, sed excute te, & observa, tuique profectus experimentum cape animi firmitate, & cupiditatum diminutione. In proficientium classe te esse existimabis, cum in te ipsum maximam habueris potestatem. Inæstimabile bonum est se possidere, & unum esse. Vir probus semper idem, improbus semper alias est.

2. Potes, si vis, unà die ad culmen Sanctitatis pervenire, si toto corde aversus à creaturis ad Deum convertaris. An verò vitam intus cum Deo agas, ex his signis de-

prehendes. Si tibi displiceant res transitoriae, si placeat solitudo, si cures quod perfectius est, si opiniones & iudicia hominum spernas. Magnum verò adjumentum ad omnem virtutem præbebit tibi vitæ & passionis Christi assidua meditatio. Ipse est liber vitæ, in quo solo, veluti in divite ac instructissimâ bibliothecâ, reperies quicquid pertinet ad salutem, et si omnes libri cum suis auctoribus interirent. Non tamen sufficit Christum scire & meditari, nisi etiam imiteris atque ita vivas, sicut ipse docuit verbo, & exemplo. Nisi ad regulam prava non corriges.

3. Præclare à quodam dictum est, eos qui proficere velint, ita vivere debere, ut perpetuo curentur. Multa enim sunt jugiter observanda, quæ ad arcem virtutis prooperanti moram injiciunt. Cùm nimis amorem inordinato vel te ipsum, vel aliquam creaturam prosequeris: cùm rebus externis ita afficeris, ut si eas auferri, vel amiti contingat, iniquo animo latus sis: cùm proprijs commodis nimis studes in cibo, potu, colloquiis, evagationibus: cùm temporalibus te nimium immersis, tuoque judicio ac voluntati pertinaciter adhæres: cum motus internos minimè observas, Deumque intus loquentem per secretas inspirationes audire contemnis. Hæc sunt præcipua impedimenta te in via detinentia, quæ ut removeas sedulo vigilabis, & te operi viriliter accinges. Animet virtus quicquid agis, animet finis perfectissimus cum promptitudine & alacritate, animet pura intentio: atque ita operi insiste, ut prænotioni quam habes de ejusdem perfectione penitus adæquetur. Non consistit profectus in multitudine exercitiorum, sed in his quæ quotidiè fiunt perfectè obeundis. Non enim in facto laus est, sed in modo, quo res fit.

4. Volant dies, festinat tempus, & quod præteritum est nemo tibi restituere potest. Non vivis, sed vixturus es: semper enim vita tua spectat in crastinum. Sic elabitur tibi vita, dum vitæ instrumenta conquiris: & interim senectus venit, venit mors, in quam incidis imparatus. Sicut iter facientes,

cientes , quos mutua decipit confabulatio , se prius ad metam pervenisse , quām appropinquasse cognoscunt: ira hoc vitæ iter assiduum , quod vigilans & dormiens eodem gradu peragis , tibi occupato & distracto non nisi in fine apparebit. Quid igitur cunctaris? quid cessas? Pretium temporis pone , utere eo celeriter : æstima hunc diem , imò hanc horam , ejus enim jactura irreparabilis est. Prædia tua à nemine pateris occupari : si exigua de finibus contentio sit , ad lites & ad arma discurris : vitam verò & tempus tibi eripi à quocumque permittis , ejus rei profusissimus , cuius solius avaritia honesta est. Computa ætatem tuam , revoca ad calculum præteritos annos . quamvis centesimum excedas , videbis te pauciores habere quām numeras. Quantum enim ex his diripuerunt somnus , gula , lites , amici , & otiosa discursitatio ? Adjice quod si ne usū jacuit , quod nihil agenti , aliudque agenti elapsum est , te non sentiente quid perderes : intelliges quām exiguum tibi de tuo relictum sit , & te immaturum mori fataberis. Sæpè quereris de transactis diebus , quos malè perdidisti : cur non eniteris sic præsens tempus tranfigere , ut eo elapso dicere possis , non video quo pæto illud melius potuerim collocare ; Singuli tantùm dies , & hi per momenta præsentes sunt. Cur hodiernum perdis , quod tuum est , & futurum disponis , quod tuum non est ? Maximum vivendi impedimentum est dilatio. Vive hodie , cras vivere serum est.

5. Deum semper in omni cogitatione , verbo , & operi , quocumque alio fine excluso , respice : & unicam ejus voluntatem sectare. Nunquam à recto tramite deviat , qui Deum sibi viæ ductorem proponit. Bono loco res tuæ erunt , si omnia quæcunque facis ad Dei gloriam dirigas , atque ita singula facies , ac si ipse spectet , qui videt omnia , omnia sustentat , omnibus providet. Ejus obtutum nunquam effugies : interest enim non verbis tantùm & factis , sed intimis cogitationibus tuis : Cum fores obdixeris , & tenebras intus feceris , ne putas te solum esse :

C. Bona Opus. Spirit.

Z

Tecum Deus est , qui secretum tuum facere sanctius debet , cui nihil clausum est. In ipso vivimus , movemur , & sumus. Coram illo comedere & bibe , cum illo ambula , cum eo tracta negotia tua , ad ipsum erige vitam tuam. Facte dignum in quem oculos figat , quem semper amabiliter spectet. Magna tibi necessitas indicta est probitatis , cum ante oculos agis judicis cuncta cernentis. Sic vive , ac si nemo in mundo sit , praeter te solum & Deum. Quicquid ejus providentia de te disposuerit , libens amplectere , sive prosperum illud fuerit , sive adversum. Deum quæris , hâc an illâ viâ ad ipsum pervenias , quid refert ? Atque utinam aliquando pervenias.

C A P. X X. *De bono solitudinis. Fugienda malorum societas. Mundi vitia quot & quæ sint. Studium Proficientis acquisitionis virtutum. Signa quædam obtinentis virtutis.*

Ingens argumentum est compositæ mentis , & à prævis affectionibus emundatae , secum posse consistere. Sicut Deus se solo beatus in se semper moratur , ita ad Dei felicitatem proximè accedes , si tecum manere didiceris. Et quidem si volueris , nunquam eris solitarius , si nunquam à Christo separeris. Quod si loquendi te corripit cacoëthes , tecum loquere , sed cave ne cum malo homine loquaris. Vis autem scire , quid tecum colloqui possis. Id quod homines de aliis libentissimè faciunt : de te apud te malè loquere. Produc vitia tua , & castiga quicquid in te animadversione dignum repereris. Nunquam deerit aliquod vitium , cui curatio adhibenda sit. Absconde te in otio , sed & otium tuum absconde. Gloriari solitudine iners ambitio est. Corporali autem solitudini internam junge , ut grata tibi atque utilis sit. Subduc te vanis occupationibus , nec ab hominibus tantum , sed à rebus etiam secede , quæ ad te non spectant. Esto liber ab omni creaturâ , & à corde tuo earum imagines exclude. Abjice omnes caducarum rerum sollicitudines , omnes cogitationum ineptias , & in abdito cordis recessu tibi soli , & Deo at-

tende. In hoc mentis silentio, in hac rerum omnium obli-
vione & nuditate, vera cordis requies, vera tranquillitas
sita est. Huc fuge, h̄c abscondere, huc semper intende:
ibi enim reperitur Deus, ubi omnes creaturæ deseruntur.

2. Si vis bonus esse, fuge malorum consortium. Nihil
tam damnosum bonis moribus, quām se populo commit-
tere. Nunquam mores, quos intulisti, referes. Animus
tener & parūm tenax recti vitiorum impetum tam magno
comitatu venientium ferre non potest. Facilè transitur ad
plures. Convictor delicatus paulatim enervat & emollit:
vicinus dives cupiditatem irritat. Unico exemplo luxurie,
seu avaritiæ perire potes. Trahunt in pravum parentes,
trahunt socii, trahunt servi. Plena omnia periculis, plena
sunt laqueis. Statim accedit in lucem sumus, in omni con-
tinuo pravitate, & in summa opinionum perversitate ver-
samur. Vix ullus in mundo est, qui non aliquod vitium
aut commendet, aut imprimat, aut nescienti allinat. Con-
tinebis te aliquando inter domesticos lares, extra forum
& commercium hominum: proh quām suavi & optatā
fugâ! Omnia intus serena, omnia tranquilla, sine nube
& vento. Accedit casu qui te evocet, sequeris. Conjungunt
se alii, fit corona, venit ad turbam, peccatur mul-
tiplici excessu, & qui bonus exieras, pessimus egredieris.
Vulnera autem animæ non deprehendis, nisi iterum soli-
tarius. Recede ergo in te ipsum, quantum potes, ne suis
erroribus mentem imbuat omnis undique ad vitia confen-
tiens multitudo. Lætior est animus, qui in pauciora di-
stringitur.

3. Crede te paulisper in celsi montis verticem subduci:
speculare indè miserrimam mundi faciem. Hinc disces ip-
sum odiſſe, & ab eo in solitudinem elongari. Cernes iti-
nera à latronibus claudi, maria à prædonibus obsideri,
fremere undique bella, & humano crux madescere cam-
pos, abruptoque fræno vitia ubique & scelera dominari.
Videbis in occulto penetrati ab impudicis ea fieri, quæ
nec ipsis quidein possunt placere qui faciunt. Invenies

Z ij

tam indigna, tam indecora, ut nemo dubitaturus sit eos insanire, si cum paucioribus insanirent: sed sanitatis patrocinium est insanientium turba. Inter leges ipsas delinquitur, nec tuta illic est innocentia, ubi defenditur. Perit innocens, absolvitur reus: minusque criminis, quam ab solutione peccatur. Nullus legum metus est, quod enim potest redimi, non timetur. Amaræ sunt obloquentum linguae, subdola ora laudantium: inde saevit odium, hinc decipit mendax officium. Alius vino madet, alius torpet inertiâ. Illum insatiabilis avaritia tenet, hunc defatigat ex alienis judiciis suspensa semper ambitio. Respice forum multitudine refertum, tantundem istic vitiorum esse fateberis, quot hominum. Peccant omnes injuriis in proximum, in Deum contemptu, in res abusu: omnia in suum congregant judicium, omnium rei. Et quomodo tutum servare vestigium, vel ad te recurrere poteris, inter tot vi-
tia omni ex parte urgentia, quæ resurgere cupientem, & in altum attollere oculos premunt, & mergunt? Innoxium aliquem esse, ubi regnant nocentium agmina, difficile est: nam si te immutare non poterunt, saltem impudent. Una est firma tranquillitas tot te malis excerpere, & in eam recedere stationem, è quâ possis mundi luem ab omni contagio liber intueri. Insuperabilis est animus, qui externa deseruit, & sibi soli vacans arce suâ se vendicat. Huic mundus carcer est, & solitudo paradisus.

4. Vanum est ab hominibus secedere, nisi cogas animum intentum sibi esse & virtutum exercitatione solerter incumbere. Nullum homini bonum est, si desit virtus: nulla quies, nulla felicitas nisi ex virtute. Tria sunt, quæ sibi mutuo in Universo respondent. Inter omnia & super omnia Deus, inter sensibilia lux, inter animi perfectiones virtus. Deus est lux & virtus omnium: lux virtus mundi & imago Dei: virtus, lux animi, per quam filii Dei nominamur & sumus. Ad hanc purgato animo accedere debes, si ad optatum perfectionis culmen pervenire desideras. Virtus enim perfectio hominis est, instauratrix inno-

centiae, omni plena jucunditate. Est supplementum naturae ad bonum supernaturale ex se ineptæ. Est facilitas boni operis, quæ recte vivimus, quæ velut cœci illuminamur, quæ peccatis resistimus, quæ meritis cumulamur, quæ vitam æternam promeremur. In hoc studio necessarium tibi primò est cujusque virtutis naturam & actus præscire, quia nemo amat quod ignorat. Tum ab actu & exercitatione nunquam cessandum: & si desint occasionses, milites imitari oportet, qui in media pace sine hoste decurrunt, fitisque velitationibus se ad vera certamina parant. Finge tibi ingentia quæque scelera objici, puta te contumeliis proscindi, omnia quæ possides à te violenter auferri & sic patientiam exerce, ac si res vera ageretur. Non trepidabis in ipsa re, si ante rem te ita exercueris. Magnos ad pugnam spiritus adfert miles, qui sanguinem sæpè fudit.

5. Virtutum habitus non nisi longa exercitatione comparantur. An verò aliquam ex illis obtinueris ex his indiciis dignoscet. Si nimis vitia virtuti opposita extinta sentias, aut magnâ ex parte compressa. Si pravarum affectionum motus sub fræno rationis legem pati, ac menti parere facile compellas. Si actus virtutis absque difficultate, imò etiam cum delectione exerceas. Si tepidorum dicta contemnas, plenaque spiritus libertate ad ea præstanta te exeras, quæ displicant imperfectis. Si pravos actus, ad quos antea per habitum inclinabaris, connaturali quodam fastidio abomineris. Si neque per somnium re aliquâ turpi delectari, aut quidpiam injustum approbare videaris. Si ea satagas imitari, quæ in aliis laudas & admiraris: atque ab illis abstineas, quæ reprehendis. Si nullam culpam exiguum putas, omnemque imperfectionem quantumvis minimam studiosè vites & observes. Si cùm vides vel audis æquales tuos divitiis aut dignitatibus florere, nec invideas, nec perturberis. Si errores tuos ingenuè fatearis, cupiens ab omnibus corrigi & reprehendi. Si conscientiae testimonio contentus

Z iii

bona opera in te ipso serues & abscondas: Recte enim facti fecisse præmium est. Si studio denique virtutis sine intermissione incumbas: nam vera virtus nunquam torpet, sed semper in actu est.

CAP. XXI. *De virtutibus Theologicis. Fides operibus comprobanda. In solo Deo ponenda fiducia. Motiva Amoris erga Deum. Amor proximi beneficiis ostenditur. Hortatio ad eleemosynam.*

1. **B**asis cæterarum virtutum & totius Christianæ vitæ fundamentum est fides, sine qua nemo potest placere Deo. Hæc est sapientia, quæ domuit orbem, cui firmiter adhærendum, omni disquisitione & curiositate rejecta. Crede autem & operare, quia fides sine operibus mortua est. Sermo tuus & professio tua jaetitant fidem: cave ne vita & mores prædicent infidelitatem. Credis Evangelium, cur non obedis Evangelio? Credis vitam æternam, cur brevissimum tempus interminabili præfers æternitati? Quid prodest credere vera & bona, si tu falsus es & mala operaris? Vix fieri potest, ut bene credit, qui male vivit: ille enim verè credit, qui exercet ope-rando quod credit.

2. Cùm certissimum sit Dei providentia omnia disponi & gubernari, adeò ut nec passer de cœlo, nec folium ex arbore cadat absque ejus nutu & voluntate; ipsi te to-tum trade excelsa animo & ingenti fiducia, nihil dubitans quin opportunum ad res omnes auxilium sis habiturus. Scito omnia humana consilia atque præsidia fallacia & incerta esse, teque regi & agi absque ulla anxietate à Deo finas. Et si res accident inopinatae, quibus actionum tua-zum & consiliorum tota series turbari & præcidi videatur, vel morbis, vel falsis criminibus, aliisque casibus gravioribus, ne despondeas animum, sed spe divinâ munitus ejus te regimini subjice: nam per hos casus, per hæc discrimina ad illum finem te divina sapientia perducit, quem tibi ab æterno destinavit. Non sentit malum præ-

sens qui futura sperat bona. Tantum potest homo, tantum habet; quantum sperat & credit.

3. Charitas omnium virtutum forma & regina & Deum respicit & proximum. Et Deus quidem ex toto corde, ex tota anima, ex totis viribus super omnia amabilia diligendus est, purè propter se & suam infinitam bonitatem. Quòd es, quòd vivis, quòd moveris, quòd sentis, quod intelligis, Dei gratia est. Ipse te à servitute diaboli redimit: ipse animam tuam innumeris prærogativis nobilitavit: ipse tibi vitam æternam nullis præcedentibus meritis præparavit. Cœlum, terra, aët, aqua & omnia quæ in eis sunt, magnis vocibus quotidiè clamant, ut summo eum amore prosequaris, à quo propter te creata sunt. Cur per multa vagaris quærendo bona animæ tue? Ama unum bonum, quod est omne bonum. Quære simplex bonum, quod est summum bonum, quo nihil majus, nihil amabilius potest excogitari. Solus amor est, quo mutuum Creatori vicem, quamvis non ex æquo rependere potes. Amor autem non est otiosus, non quærit quæ sua sunt, operatur magna, si est. Nulla amori impervia difficultas. Verus amator mori potest, vinci non potest.

4. Natura omnis amorem indicit mortuum & sociabiles fecit: omnes enim homines magni corporis membra sumus, ad eamdem fidem & gloriam vocati. Non amat Deum qui non diligit fratrem suum. Actus verò dilectionis erga Proximum, sunt beneficia omnibus conferre, omnibus prodesse, omnes obsequio & amore prævenire. Beneficia autem læto animo & prompto indigentibus conferes, nullâ intercedente morâ, nisi in accipientis verecundia. Sufficiat ad remedium tristius quidpiam passis, quod eorum indigentiam scias. Moleustum verbum & onerosum est, Rogo: si amici desiderium occupas & antecedis, antequam rogeris, multiplicas munus tuum. Non tulit gratis; qui cùm rogasset, accepit. Si prævenire non potuisti, plura rogantis verba intercide, ne rogatus videaris: teque daturum ipsa festinatione approba,

Z iiiij

etiam si non fuisses interpellatus. Tum bona verba bonis rebus adjice, nec quidquam triste misceas beneficio, non mœstiam, non tarditatem, non exprobrationem, non denique jaētantiam. Res ipsa te silente loquetur & qui videt in abscondito, reddet tibi.

5. Inter aëtus Christianæ beneficentiae præcipuum tenet locum eleemosyna, quâ fides probatur, redimuntur peccata, emitur cœlum. Cave ergo ne despicias pauperem, qui cum sibi egenus sit, te facere divitem potest. Peccatis tuis venundatus es, redime te pecuniâ tuâ: fac de instrumento avaritiæ subsidium misericordiæ. Histro te ad risum provocans plenus à te recedit: Christus offens regnum cœlorum nihil accipiet? Tributa Principi vel invitus solvis, etsi ex agris nihil perceperis; Christo Regi ex eo, quod superabundat, frustum panis denegabis? Cave ne parcens pecuniis tuis, reus sis sanguinis fratris tui. Si non pavisti, occidisti. Cogitas quâm bene alii post te vivant, non cogitas quâm male tu moriaris. Satiūs est deesse aliquid hæredibus tuis de patrimonio, quâm tibi de salute. Inspice rationes tuas. Vide quid in æterna patria, quid hîc possideas. Ex omnibus rebus tuis, id solum in morte reperies, quod per manus pauperum in cœlum præmisisti. Argue infidelitatem tuam. Invadere domum hostis potest, cœlum non potest.

CAP. XXII. *De Prudentia. Ejus necessitas, & difficultas. Officium viri prudentis.*

1. **U**T Architec̄tis nullum opus rectè procedit sine linea, & libella, ita nec nobis sine prudentia. Hæc norma cæterarum virtutum est, recta ratio agendorum, oculus animæ, & ars vivendi. Non potest esse jucunda vita, à qua absit prudentia. Hanc artem difficillimam esse omnes fatentur. Sed & obscura est. Oritur ex eo difficultas, quod intra considerationis suæ ambitum res omnes tam universas quam singulares complectatur. Ac deinde quod nullus sit certus status rerum humanarum,

quæ cùm sint varia & contingentes, atque à diversis pendeant circumstantiis? non est cujusque ingenii certam in illis statuere normam, & quæ non raro repugnantia sunt certo quodam temperamento conjungere, & miscere. Obscuritatem verò adfert caligo illa, quâ rerum gerendarum causæ involvuntur. Apparet quidem earum fastigia, sed latent fundamenta. Latet etiam divinum decretum de prospero vel infelici rerum eventu, unde fit ut paucorum sit ista virtus. Pauci possunt quid magis expediāt in quovis negotio prævidere.

2. Prudentiam gignunt usus, & memoria. Res enim singulares quas illa regit, notæ homini sunt per usum, & experientiam. Tutus eris si tuo & alieno credideris experimento, nec altiori rei te impones, in qua tibi tremendum, & unde cadendum sit. Ut verò omnia prudenter disponas, inspicere primum debes teipsum, deinde negotia quæ aggredieris, tum eos quorum causâ, vel cum quibus agendum est. Et teipsum quidem accuratè æstimabis; ne plus quam potes tibi posse videaris. Aliquis eloquentiæ fiducia prolapsus est, quidam patrimonio suo plus imperavit quam ferre queat, alias infirmum corpus laborioso oppressit officio. Æstimanda sunt postea quæ aggredieris, & vires tuæ cum rebus agendis comparandæ. Opprimunt onera, quæ ferente majora sunt. His quoque admovenda manus, quorum finem aut facere, aut certè sperare possis. Hominum deinde delectus habendus est, an digni sint, quibus partem vitæ tuæ impendas: eorum mores examinandi, ne tibi noceas, dum aliis prodesse studes. Denique considerandum est, utrum natura tua rebus hujusmodi agendis idonea sit, & eo inclinandum quo te vis ingenii defert. Reluctante naturâ irritus labor est.

3. Vir prudens nihil aggreditur, quandiu aliquâ perturbatione agitatur: non enim potest verum & honestum discernere concusſa mens, & pravæ affectionis præstigiis delusa. Multum item prudentiæ adversatur præcipitatio, quæ in graves ac inextricabiles casus plerosque induxit.

Quare prudens nil temere agit, propriumque judicium alieno consilio subjicit. Timidæ sunt hominum cogitationes, incertæ providentiae, rerum exitus dubii, fallaces experientiae. Ibi salus, ubi multa consilia. Spectat quoque ad prudentem, rem denudare, & acutè introspicere sine fuco & integumentis, quæ decipere incertos solent. Seponere pecuniam, famam, dignitatem: intus rem ipsam scrutare: quære quid sit, non quid vocetur. Stultum est simulachris & umbris falli. Tum debes veluti ex specula quicquid evenire potest explorare, ne stultum illud quandoque dicendum sit, Non putaram. Ad id longa consultatio adhibenda, maturumque judicium, & subtile examen, ne prava aliqua circumstantia actionem vitiet, ne prudentia degeneret in astutiam & calliditatem, & ne in tanta veri ac fucati boni vicinia vitium pro virtute amplectaris. Peracta denique electione, omnem praecide moram, statimque exequere quod decrevisti. Nullus cunctationi locus est in bono consilio, quod non potest laudari, nisi peractum.

C A P. XXIII. *De Iustitia, & Religione. Actus utriusque. Quid sit Pœnitentia, & in quo consistat.*

1. **I**ustitia suprema virtus aliis nata non sibi, quicquid habet transfundit in proximos, nihil petens ex se nisi usum sui. Hæc homines à mutuis injuriis avertit, & mundum universum in pace constituit. Hæc tacita quædam naturæ conventio est, & vinculum societatis humanæ, nec quidquam sine illa laudabile esse potest. Vir justus neminem lædit, alienum non vendicat, omnibus prodest, benè de omnibus sentit & loquitur, dat unicuique quod suum est, non impedit alterius bonum. Si præsit, justa præcipit, omnibus patet, propriisque utilitatibus subditorum commoda præfert: pœnis vitia coercet, præmia bonis largitur, & sic omnes continet in officio. Si subsit, servat concordiam, legibus paret, & iussis majorum, suorumque statu contentus officia & dignitates non app-

tit, nec se rebus ingerit, quæ ad se non spectant. Gratis autem justitiam colit, quia justæ actionis nullum majus præmium existimat, quām justum esse.

2. Religio moralium virtutum præstantissima Deum immediate respicit, ejusque cultum & honorem. Primus autem cultus est ipsum credere & cognoscere: deinde reddere illi majestatem suam, reddere bonitatem. Parum est nosse Deū, & quod Dæmones faciunt qui oderunt: amor insuper & cultus exigitur his ex rebus constans, quæ utiliam tam benè implerentur, quām sciuntur. Scis Deum illum esse, qui præsidet mundo, qui humani generis tutelam gerit, qui universa moderatur. Ipsum solum potentem, solum bonum, solum altissimum confiteris: ab eo tanquam à summo bono & tuo ultimo fine perpetuam beatitudinem expectas. Cur non igitur, ut par est, eum colis? cur non summam ei exhibes venerationem? cur vilissimam terræ glebulam ei præfers? Vana est religio tua, nisi factis comprobetur. Vis verè religiosus esse? Ambula coram Deo & esto perfectus. Satis eum colit, qui imitantur. Vera Religio te Deo religat, Deum tibi. Custodi eam illibatam à negligentia, ab erroribus, à peccatis. Stultitia magna est fidem linguâ, moribus infidelitatem prædicare. Hujus notæ homines irrisit olim celeberrimus inter Ethnicos Philosophus dicens, Nihil glorioius esse Christianis, cùm loquuntur: nihil miserabilius cùm operantur.

3. Divini juris læsi reparatrix est Pœnitentia, quæ ad peccati detestationem inclinat, cum efficaci voluntate Deo per illud offenso satisfaciendi. Hæc est enim pœnitentia præterita peccata detestari, expiare, nec amplius in ea consentire. Præterit quod delectat, restat quod argit, quod torquet, quod damnat. Quid prodest transactam fœditatem abscondere? Nemo nocens se judice absolvitur. Tribunal quoddam à natura in ipsa mente humana constitutum est, ubi unusquisque sui sceleris accusator est & testis & judex. Hic coge animum & sensus

tuos quotidiē adesse ad reddendam rationem. Dic apud te causam & quantum potes te ipsum coargue. Totum diem tecum scrutare: omnia dicta & facta tua, atque ipsasmet cogitationes remetire, nihil abscondens, nihil transiens. Si agnoscis iniquitatem tuam, ignoscit Deus: si fateris, mederis. Quid refert neminem scire vitium tuum, cùm tu scias? An utilius tibi existimas damnatum latere, quām palam absolvi? Ubi cumque lateas, conscientia tecum est, non potes eam effugere. Miserrimus es si hanc aspernaris.

4. In tria tempora vita dividitur, quod est, quod fuit & quod futurum est. Præsens momentaneum est, ante desinens quām veniat: futurum nondum est: at præteriti dies aderunt omnes cùm jussieris & ad arbitrium tuum se inspicci patientur. Ne timeas memoriam tuam, nec erubescas te in præteritum retorquere, erroresque tuos tibi exprobrare. Quò frequentius id feceris, eo citius emendaberis. Ipse de te vindictam sume, nec ea iterum admittas, quæ fecisse te plangis. Plerique liberati à naufragio exinde repudium & navi & mari dicunt, Deique beneficium periculi memoria honorant. Hanc bonam sollicitudinem in te esse cupio, ne iterum experiri velis quod semel timuisti. Grande periculum evasisti, ne te iterum discrimini exponas. Toties pepercit Deus, quoties deliquisti: cave ne idcirco deterior fias, quia Deus bonus est. Quid facturus sis cogitas aliquando, cur non potius quid feceris? Nam consilium futuri ex præterito venit. Multi ad sapientiam pervenirent, nisi jam putarent se pervenisse. Nisi te quotidiē emendes, quotidiē deterior eris.

C A P. X X I V . *De Pietate, & Observantia. Obedientia commendatur, itemque Gratitudo. Quomodo accipendum, & reddendum sit beneficium.*

1. **N**ullā vi verborum exprimi potest, quām laudabile opus sit posse hominem dicere; Parentibus meis cessi & parui semper: eorum imperio, sive æquum, sive

darum fuerit, obsequentem & submissum me præbui : bonum patriæ civem me semper exhibui : fratribus & consanguineis benè facere nunquam cessavi : omnes vincere beneficiis conatus sum. Hæc sunt nimis rūm Pietatis officia , quibus debitum tribuimus cultum, patriæ, parentibus, fratribus & aliis sanguine conjunctis. Quid verò pietas erga cognatos , id præstat observantia erga Prælatos , Principes , Præceptores & alios , qui aliquo modo nos antecedunt dignitate , sapientiâ, ætate, religione & sanctitate. Solemus enim coram illis assurgere, caput aperire , viâ decedere , equo aut vehiculo desilire , ad genua provolvi , manus aut vestes osculari , aliaque honoris signa pro more patriæ exhibere, Hæc autem omnia profuso ac reverenti animo præstabis , si præcesserit in intellectu magna sublimitatis illorum æstimatio. Nam hinc orietur in voluntate fuga quædam & metus , quo perculsus nimiam cum illis familiaritatem declinabis , atque ab eorum magnitudine in tuam quodammodo resilles parvitatem. Omnis potestas à Deo est. Quicquid præstiteris majoribus tuis , infra debitum honorem erit , si Deum in illis consideraveris.

2. Ut ex primi parentis inobedientia omnis calamitas exorta est , sic per obedientiam filii Dei ad felicitatem reduci sumus , si & nos obedientiam servaverimus. Obedientia rerum omnium perfectio est , earumque cum suo principio firmissima connexio. A Deo enim in Deum admirabili circulo cuncta ducit. Hanc Christus præ cæteris virtutibus commendavit , qui ne eam perderet , perdidit vitam. Hæc melior dicitur esse quam victimæ , quia per eam propria voluntas maestatur. Suscipiendum est autem superioris edictum velut emissâ divinitùs vox , nullâ quæ sitâ præcepti causâ vel motivo. Nescit judicare , qui perfectè didicit obedire. Moneat superior , jubeat lex , dicat quid me velit facere : non disco , non disputo , non excuso : sed simpliciter & velociter pareo , paratus ad omnia seu facilia seu ardua pari gaudio & promptitudine

exequenda. Unum est in quo refractarius & contumax esse potes , si quis nimis à bono te retrahat & adversus Dei legem impellat. Cætera omnia constanter & sine murmure exequi debes.

3. Gratitudo debitum respicit ob acceptum beneficium. Nihil autem magis præstandum , quām beneficii æstimatio , si non ex rei magnitudine , saltem ex animo & affectu donantis. Tum jugis benefacti memoria necessaria est , quę semper animo hæreat. Gratiam referre nequit , nisi qui meminit : & qui meminit , jam refert. Hoc non exigit opes , non operam , non felicitatem , in promptu omnibus est. Ut desint vires , nunquam deerit voluntas , quā rependere etiam Regibus potes. Cùm ab aliquo accipis beneficium , hilaris accipe & gaudium profitere , quod fit danti manifestum , ut munera sui fructum capiat. Justa lætitiae causa est lætum amicum videre , justior fecisse. Qui gratè beneficium accepit , qui libenter & benignè , primam ejus pensionem solvit. Nunquam voluit gratus esse , qui beneficium tam longè projicit , ut extra conspectum sit. Qui illud extollit , qui se negat gratiam referre posse , jam reddidit. Qui fastidiosè accipit & negligenter , parvi facere illud videtur. Qui vix indicat se sensisse , vix labia deducit , ingratior est , quām si taceret. Vir bonus dum accipit beneficium de reddendo statim cogitat. Quid enim tam contra officium quām non reddere quod acceperis? Nec mensurā pari , sed uberiori reddendum , sicut terra suscepta semina majori cumulo restituit. Cave tamen ne in gratiæ relatione nimis feistines. Quidam , cùm aliquod munus illum missum est illis , aliquid subinde intempestivè remittunt & se nihil debere testantur. Rejiciendi hoc genus est cùm munus munere subito expungis.

CAP. XXV. *De Veritate, ejusque usu. Simplicitas lan-*
datur. Actus fidelitatis.

1. **I**N omni sermone, gestu & scriptura, aliisque signis externis veritas sit. Non deceat Christianum hominem labium mendax. Muliebre vitium & plebeium est aliud pectore claudere, aliud ore proferre. Vir generosus res simpliciter enuntiat prout sunt, non exagerat, non amplificat, non decipit, non simulat, verborumque ambages & involucra devitat. Simplicia verba veritas simplex amat. Vult nuda videri, quia innocens est. Qui vero mentitur aut fallit, rem duplice sermone obscurat, ut lateat. Odit lucem qui male loquitur sicut qui male agit. Cave itaque ne ut vestitum, sic sententiam habeas, aliam domesticam, aliam forensem: ne in fronte ostentatio sit, intus veritas occultetur. Ab hoc vitio abhorret ipsa natura. Pueros vide nondum ratione utentes. Mendacium inter prima probra objiciunt & quanvis levitate quamdam assumant, tamen insitâ judicij rectitudine damnant. Quia in re Dei providentiam admirari oportet, quae virtutes animo inserit, sine quibus vita & societas stare non possunt. Omnium autem perniciosissimum est mendacium vitae. Nam si omnem sermonis falsitatem abominaris tanquam sublimi animo indignam, cur ipse mendacium esse, & vivere non formidas? Magna res est unum hominem agere.

2. Simplicitas parum hominibus cognita virtus, tantæ est dignitatis ut eam Deus magnopere delectetur: nam *cum simplicibus sermocinatio ejus*. Simplex enim ille & integerimus cum sit: simplices esse vult animas, quæ ad se conveniunt. Est autem simplex, qui in varia non abit: qui sine duplicitate & hypocrisi talem se exterioriùs exhibet, qualis interioris est: qui proprios defectus, cum fert occasio, candidè & sincerè fatetur, qui malitiâ parvulus est & omnem politicam agendi rationem detestatur: qui non exclusâ prudentiæ circumspetione, fidem in omnibus

esse arbitratur, malum de nōmine suspicatur: qui stultus apud homines videri non refugit, ut sit sapiens apud Deum: qui ab omni multiplicitate alienus simplici intentione Deo placendi cuncta operatur. Quid turbaris erga plurima infelix astutia? Unum est necessarium, ut ad eum pervenias, qui unus & simplicissimus est. Nunquam pertinges ad metam, si dupli gradieris viā.

3. Fidelitas inter maxima & præcipua humani generis bona colenda est: hâc enim sublatâ tollitur usus commerciorum, dissolvitur amicitia, fœdera dissociantur, universa Respublica perturbatur. Rara tamen & ista est, ac ferè mundo incognita virtus. Passim accusant humanam perfidiam tot ad contractus adhibiti testes, tot stipulationum firmamenta, tot interpositæ industriae, quæ nihilominus vix sufficiunt, ut firma maneant pacta & conventa. Adeò plerique sordidi sunt, ut sanctior sit illis quæstus quam fides. O turpem humano generi publicæ fraudis ac nequitiæ confessionem! Nemini credimus sine teste, sine sponsore: & tutius in tabulis, quam in animi sacrario fidem custodiri arbitramur. Cæterum vir fidelis quodcumque opus promissum constanter exequitur, commissa sibi secreta nemini pandit, datam fidem etiam hostibus servat, ipsamque regnis ac vitæ præfert. Tardè quidem promittit, quia celeri sponsioni celerem incumbere pœnitentiam novit: sed si semel spoondit, non fallit, non violat, nisi forte rerum status mutetur, aut peccandi periculum incidat. Neminem obligat promissio, quæ non potest sine scelere adimpleri.

C A P. XXVI. *De Amicitia. Quibus officiis sit colenda.*
Præcepta quadam ad mutuam conversationem
pertinentia.

1. **N**ihil magis ad humanam vitam necessarium, quam amicitia, nihil commodius, nihil jucundius. Ea est mutua duorum benevolentia in virtute fundata & bonorum communicationi conjuncta. Quantum hoc bonum est,

est, ubi præparata sunt pectora, in quæ tutò secrètum omne descendat: quorum conscientiam minus quam tuam timeas, quorum sermo sollicitudinem leniat, sententia consilium expediat, hilaritas tristitiam dissipet, conspectus ipse delectet? Quid dulcius quam hominem habere, cui confiteri non timeas si quid deliqueris, cuius vel solus occursus proposit tibi? Minuta quædam animalia cum mordent non sentiuntur, adeò tenuis est illis & fallens in periculum vis; tumor indicat mortuum, idem tibi eveniet in boni amici conversatione, non deprehendes quemadmodum & quando tibi proposit, profuisse deprehendes. Vera autem esse amicitia nequit, nisi reciprocus interveniat amor; sed amare principalius est quam amari: atque ideo benevolentia pro fundamento statuitur, redamatio connotatur. Vera item amicitia est, & Christi glutino copulata, quam non utilitas rei familiaris, non sola corporalis præsentia, non mendax obsequium, non fallax adulatio; sed timor Dei & divinarum studia literarum conciliant. Solida in malo amicitia esse non potest.

2. In eligendo amico magna cautio exhibenda, juxta illud quod vulgus ait: multos salis modios simul edendos esse, ut amicitiae munus expletum sit. Sunt autem quatuor in eo probanda. cum quo inire amicitiam cupis. *Fides*, res difficillima, cuius sola ferè umbra in tertis reputatur, ut te & tua ei tutò committas. *Intentio*, ut amicitia finem honestum habeat & res divina non transeat in turpitudinem. *Discretio*, ut scias quid præstandum illi, quid ab eo petendum. *Patientia*, ut paratus sit animus quæcumque adversa pro amico sustinere. Hæc cum in illo probaveris, explorare insuper debes, prioribus amicis quomodo usus sit: nam talem in te futurum sperabis, quem cæteris se præbuit. Fidus amicus vivus thesautus est, magnâ servandus curâ, magno, si pereat, fletu lugendus. Beatus es si talem habes, qui te diligit, non tuas opes, non mensam, non ingenium: qui errantem corrigat, ca-

B. Bona Opus. Spirit.

A a

dentem sublevet, currentem adhortetur. Similem illi non invenies, quacunque cœli ambitus pater. Multi sunt, qui dicuntur amici, eorum qui verè sint paucissimi numerantur. Nemo alterum gratis amat. Qui se spectat, qui res externas sibi pro fine proposuit, verus amicus non est. Tandiu te diligit, quamdiu utilis ei fueris. Sublatâ mensâ deficiet; atque ut cœpit, sic desinet. Vera amicitia ibi maximè deest, ubi creditur abundare.

3. Sicut Medicus carissimum sibi ægrotantem curatur nec ferro, nec igni parcit: ita erga amicum correctione indigentem te gerere debes, liberrimè, audacter, constanter, nihil negligendo, aut dissimulando. Damnable est obsequium, per quod vitia foventur. Sit autem admonitio secreta, adsit ei omnis suavitas, careat omni verborum acerbitate. An aliquis tibi in amicitiam recipiendus sit, diu delibera; cum placuerit fieri, toto illum pectore admitte: tam liberè cum eo loquere, quam tecum. Ita quidem vivere debes, ut nihil tibi committas, nisi quod inimico committere possis: sed quia interveniunt quædam, quæ consuetudo fecit arcana, omnes curas cum amico, omnes cogitationes misce. Quidam quæ solis amicis committenda sunt, obviis narrant & in qualibet aures quicquid urit exonerant: alii etiam carissimorum conscientiam reformidant & intra pectus omne secretum premunt, nec sibi quidem credituri, si fieri posset. Utrumque vitium est, & omnibus credere & nulli; sed alterum honestius, alterum tutius. Quod si cupis sine periculo cum omnibus loqui, id facilè assequeris, non occultando quæ feceris, sed nihil faciendo quod velis occultum esse.

4. Affinis amicitiae est affabilitas, quæ humanam conversationem moderatur, in qua servanda modestia est, servandum silentium. Multa decet audire virum probum, pauca loqui. Vitiosum est velle potius sciri, quam scire; cognosci, quam alios cognoscere; proprias merces inutiliter prodigere; quam sibi alienas comparare. Assueceris

opert eorum cum quibus vivis verbis & moribus incompositis : & quia multi multa loquuntur falsa, inepta, puerilia, nihilque ad rem pertinentia, hæc prudenter disimulabis. Animi abjecti ac muliebris est, cum iis dumtaxat versari velle, qui cedant, applaudent & adulentur. De te rebusque tuis parcias loquere, tuæ sententiæ ne pertinaciter inhæreas & à verbis elatis abstine, quæ auctoritatem & magisterium sapiant. Cum quidpiam contra decorum occurrit tibi, in te regressus teipsum interroga, an & tu tali vitio labores : tum ex omnibus quæ audis & vides, aliquid semper ad tuum profectum excerce. Bene tecum agitur, si ex alieno peccato tuum emendas.

5. Cum tibi aliquid occurrit insolitum, inopinatum & ab usu tuæ patriæ abhorrens, ne id continuo reprehendas : nam levis animi indicium est aliena mirari & redire & suo servire municipio. Res æstimandæ prout sunt, non ut videntur. Vulgus omnia æstimat ex novitate, artificio, raritate, difficultate, pompâ, rumore & extrinseco apparatu : sapiens intrinsecum rei pretium & honestatem respicit ; eaque omnia spernit, quæ plebs insana admiratur. Quicquid acciderit penes te est ut fructum ex eo capias. Noli te coarctare & limitare proventum tuum. Licet tibi personam obducere & actores fabulæ imitari. Illi dum flent, non dolent ; dum emunt, non possident ; jubent sine imperio, objurgantur sine vindicta, objurgant sine ira : agunt scilicet alienam vitam. Utinam & sic in aliorum societate te geras sine affectu & proprietate. Magnum theatrum mundus est, in quo tot histriones, quot homines sunt. Cura autem ut quantum fieri potest spectator sis, non actor fabulæ. Qui spectaculum sui in scena exhibent, laborant : qui spectant, rident & delectantur.

CAP. XXVII. *De Liberalitate. Quid sit & qualiter
exercenda. Quomodo differat à Magnificentia.*

1. **N**on voco liberalem pecuniae suae iratum, qui nec dare scit, nec servare: qui non donat, sed proponit. Liberalis est, qui recte dat & rationabiliter & promodo facultatum quantum decet impedit, quando & quibus oportet, non suum sed alienum spectans emolumen-tum. Porro liberalitas virtus est beneficiorum erogatrix quae circa pecuniarum largitionem & acceptionem versatur; sed largitio principaliter intenditur, quia prestantius est dare, quam accipere. Sufficit autem voluntas, cum tribuendi facultas deest: immo haec maxime attenditur ut non solum pro sis, sed velis prodeesse. Nemo huminibus aut mari gratias agit, quod navigia patiantur: neque arboribus, quod fructus ferant: nec vento, quod secundus aspiret: nam licet haec omnia beneficia sint, illis tamen deest beneficiandi voluntas. Quod vero alicui donandum est, pretium a celeritate sortitur. Sunt nonnulli, qui dum aliquid donant, gratiam omnem corruptunt, avertendo vultum, obducendo frontem & in alterum diem differendo. Sic amicum dilatione lassant, torquent expectatione; cumque proprium sit libenter donantis citato dare, qui diu noluit, non ex animo largitus est. Properat omnis benignitas & jucundum est munus quod obviam venit.

2. Non potest quisquam beatè degere, qui se tantum intuetur, qui omnia ad utilitatem suam convertit: alteri vivas oportet, si tibi vivere optas. Quid tanquam tuo parcis? Procurator es. Omnia ista quae ferreis claustris custodis, quae ex alieno sanguine rapta tuo defendis, tua non sunt, Deposita apud te fuerunt & jam ad alium dominum spectant. Aut hostis illa, aut hostilis animi successor invadet. Quæris quomodo facias tua? Donando. Quid est hoc, quo te divitem putas? Domuncula, pecunia, agellus: si donaveris proximo, beneficium erit, virtus

erit, quæ tecum in æternum manebit. Tunc pretiosa est pecunia, cum usu largiendi desinit possideri.

3. Quia tenui impensa fieri magna non possunt, ut mediocres sumptus liberalitas regit, ita splendidos & magnificentia. Hæ duæ virtutes cætera similes hoc discrepant, quod illa etiam in parvis, hæc non nisi in magnis & luculentis apparet. Cui res angusta domi est, liberalis esse potest: laudem vero magnificentiæ ille solus assequitur, cuius opulentia spectabilis est. Hæc propriè in operis admirabilitate conspicitur. Si quis enim magni pretii gemmam in usum rei divinæ largiatur, eximiè potius liberalis quam magnificus dicendus erit; sed si pretio gemmæ sacrarium, templum, aut aliud splendidum ac mirabile opus extruxerit, magnificus nuncupabitur. Operum verò nomine in quæ magni sumptus conferri possunt, ea intelliguntur, quæ pertinent ad cultum Dei, ad populi utilitatem, ad publicam hilaritatem & ad quædam hominis officia splendorib[us] præstanta. In his decori ratio habenda est, respectu operantis & facultatum. Non est magnificus, qui plura quam habeat profundit: iqui ære alieno se & suos gravat, ut magnificentiæ laudem consequatur. Verè liberalis & magnificus ille est, qui quod donat & expendit, detrahit sibi.

CAP. XXVIII. *De Fortitudine. Quæ sint ejus Officia.*
Mortem à viro forti contempnendam esse.

1. **M**olles sunt hominum animi debilisque natura, quam idcirco fortitudine armare oportet, ne periculis deterriti ab honestate recedamus. Duplex ejus officium est: unum, idque præcipuum, labores atque pericula sustinere: alterum eadem aggredi cum oportet. Vir fortis non se temere malis ingerit, sed advenientia constanter fert: non appetit formidabilia, sed spernit: ibi extollitur, ubi cæteri deprimuntur: ibi stat, ubi alii jacent: non illum subigit dedecus, non repulsa, non exilium, non injuriæ: non eum carcer, non tormenta, non

A a iiij

ipsa mors exterrent : omnem luctum , omnem ægritudinem , omnes molestias magnitudine suâ elidit : non se minis aut precipibus à recto detorqueri permittit : non despontet animum , et si plura benè cœptis obsistant impedimenta : non cedit oneri , nec cum officio semel suscepito luctatur ; sed persistit , donec perficiat ; stat rectus sub quolibet pondere : nulla illum vis , nulla potentia , nullus terror minorem facit : periculis undique imminentibus non allidit virtutem nec abscondit. Quò tendat semper attendit , non quid patiatur.

2. Sicut secundo navigans vento variis se subsidiis munit , quibus tempestatem excipiat : sic utile erit tibi , donec prospera est fortuna , quætere præsidia , quibus adversam fortiter feras. Finge tibi jam advenisse quicquid sinistri contingere potest , orbitatem , naufragium , exilium , vulnera , tormenta , morbos , calumniam , contumeliam ; atque ita te compara , ac si jam in discrimine versareris , ut hoc quasi præludio excitatus dicere possis in omni eventu : Hæc jam animo percepi , jam prævidi & contempsi. Ab æterno constitutum est , quid gaudeas , quid fleas : & quamvis magnâ varietate singulorum vita distingui videatur ; summa in unum venit. Accepimus peritura perituri. Quid indignaris ? quid quereris ? et si omnia tua pereant , nihil perit de tuo. Satius est dare quod repetit Deus , quam cogi ad solvendum. Virum sapientem etiam in tormentis beatum fore ipsem Epicurus edocuit. In Phalaridis , inquit , tauro si fuerit , dicet : Quam suave est hoc , quam hoc non curo ! Magnum quidem effatum , sed nobis non incredibile , apud quos extant tot Martyrum exempla quorum in pœnis constantia , in flammis alacritas tanta fuit , ut nullo modo sentire tormenta viderentur. Volenti & Deum amanti omnes pœnæ deliciae sunt.

3. Nullibi clarius fortitudinis præstantia elucet , quam in mortis discrimine . Difficile est animum perducere ad contemptum vitæ , cuius amore ita plerique tenentur , ut nihil eâ felicius , nihil pretiosius æstiment. Sed si sapiens

es, ut te esse oportet, desines inter mala numerare mortem, quæ finis malorum est & initium vitæ. Æquo animo exire debes, redditurus. Mors invictam necessitatem habet, eam timere dementis est: dubia enim sunt quæ metuuntur, certa expectantur. Considera nec pueros, nec mente lapsos timere mortem. Turpissimum est autem, si eam tibi securitatem ratio non præstat, ad quam stultitia perducit. Cum exceptione mortis data est vita: vivere noluit, qui mori non vult.

4. Gratificata est nobis natura; cum ad certum tempus usuram spectaculorum suorum concessit: jam exacto tempore discedendum est. Quis sapiens ad extremum spiritum redactus si rursus ei vita concederetur, vellet iterum materni uteri ergastulum subire, resumere amentiam infantiae, metus puerilitatis, juventutis pericula, curas virilitatis, labores senectutis? Nemo tam feliciter vixit, cui placeret iterum nasci. Attende igitur quò properes & à quibus discedis. Posses vitæ hujus exitum non timere, si alterius ingressum sperares. Hæc est causa timoris tui, quia inanis bonorum es, quorum incipis in fine vitæ desiderio laborare. Alioquin non trepidares in limine æternæ felicitatis. Viro justo supplicium esset nasci, nisi mors sequeretur.

5. Nemo mortem lætus exceptit, nisi qui ad illam se diu composuit. Effice eam tibi assiduâ cogitatione familiarem, ut venientem alaci animo excipias. Ut satis vixeris non dies faciunt, non anni, sed animus exire gestiens & ad originem suam revolare. Diu vixit, qui bene moritur. Bene moritur, qui bene vixit. Vis mortem tibi tranquillam parare? Assuesce ex alto cuncta despicere. Non potest mortem timere, qui jam plura sibi eripiuit, quam rapiat mors. Vis tibi vitam jucundam facere? Omnem pro illa sollicitudinem depone: ad omne genus mortis paratus esto, sive gladius vitam, sive febris abrumpat, nihil tua intersit: vitam sic institue ut liceat tibi quotidiè dicere: Vixi. Ille securus vivit & lætus moritur; qui se singulis diebus ef-

A a iiiij

fert, cui concessum est vivere vitâ peractâ. Non potes
bene vivere, nisi quotidiè moriaris.

CAP. XXIX. *De Magnanimitate. Viri magnanimi
aëscriptio.*

1. **M**agnum aliquid ipso nomine sonat Magnanimitas, excelsa virtus, cuius robustissima vis est, semperque tendens ad magna. Sine hac irritus cadet omnis conatus reliquarum virtutum; nam cum multæ in earum exercitatione occurrant difficultates, adversus eas mens erigi & contrà audentior ire debet; nec priùs absistere, quam perruptis interpositis obicibus ad boni sibi propositi adeptionem generosè pertingat. Hoc præstat homini Magnanimitas, quæ ad magna & heroica opera semper inclinat, Deique opæ subnixa securè ac promptè res quaque difficiles aggreditur. Audendum est aliquid, si vis aliquid esse. Non potest parvo res magna constare. Magna res est homo, cum verè est homo.

2. Magnus animus ad magna semper aspirat, eaque omnia velut minuta contemnit, quæ pro maximis vulgus optat. Opera quidem efficit, quæ multo honore sint digna, sed ipsum honorem, & denegatum non ambit, & spernit oblatum, nisi aliter exigant Dei honor, & obedientia. Nihil ad ostentationem, omnia ad conscientiam refert: recteque facti non ex populi sermone mercedem, sed ex facto petit. In edito stat semper, excelsus, insuperabilis, par sibi in omni rerum statu: nec locis altioribus se ingerit, contentus magnitudine suâ. Super omnia eminet omnium dominus, & ideo nulli se submittit, neminem rogat, quia extra se nullâ re indiget. Nihil est quod ipsum terreat, aut incurvet. Se profert, & spectari vult non vanitatis studio; sed attento gradu, in quo degit, & Dei donis, quibus resulget. Stat tamen cum his inconcussa humilitas summa coram Deo, quia omnia bona sua, omnemque gloriam in ipsum refundit, pro certo sciens se ex seipso nihil habere, nihil posse, nihil

esse. Hoc est virtutis fines agnoscere, de se suisque rebus humillimè sentire : iisdem tamen habitos honores salvâ modestiâ non repudiare. Sequi debet gloria, non appetit.

3. Excipit adverso pectore omnia adversantium tela nihil reluētans, ut ad summum virtutis fastigium perveniat. Cum viris mediocribus & infimis modestum se ac moderatum exhibet, coram Principibus & opulentis nec se projicit, nec adulatur, nec eorum potentia suam opprimenti sinit libertatem. Quæ odio vel amore digna sunt apertè odit, apertè amat : quæque palam dici vel fieri debent, liberè loquitur & operatur ; quia nihil timet aut sperat. Facit eadem quæ cæteri hominum, sed non eodem modo ; atque ideo utitur dissimulatione in vulgus, nec se facilè populo miscet. Non meminit injuriarum, & in his quæ necessariò perferenda sunt, nec querulus, nec supplex est. Paucos laudat, nec ipse laudari optat, sed facere laude digna. Non vivit alterius nutu, nisi amici & superioris : neque facilè admiratur, quia nihil illi magnum vel novum videtur. In omni casu seipso tutus, nullis rerum movetur eventibus. Motum habet tardum, vocem gravem, orationem stabilem ac sedatam : non enim festinat, qui paucis rebus studet ; nec vehementer contendit, qui seipso contentus est.

CAP. XXX. *De Patientia. Ejus occasiones, & effectus. Indicia vera Patientiae. Ad omnia mala ferenda parænesis & documenta. Necissitas Perseverantiae.*

1. **P**atientia est virtus, quâ mala hujus sæculi æquo animo sustinemus. Quia verò hæc mala plurima sunt, varia sortitur nomina pro varietate malorum, in quibus sustinendis versatur. *Patientia* propriè dicitur, cùm injurias fortiter excipit : *Æquanimitas* cùm in ferenda jactura honorum exteriorum occupatur : *Longanimitas*, cùm pectus munit adversus rei expectatæ dilationem : *Constantia* cùm firmat voluntatem ad alia quæcumque

mala, propria & aliena, privata & publica toleranda. Nulla est virtus, cuius exercendæ crebriores incident occasiones. Tot enim irruunt malorum agmina, tot nos obsident adversarii, ut rectè dictum sit militiam esse vitam hominis super terram. Nullum perè momentum labitur, quo strenuè dimicandum non sit. Ut desint externi hostes, satis sibi quisque infestus est. Ex nobis, & in nobis nascuntur, quæ nos cruciant & exercent. A fletu auspicamur vitam, rudes ad omnia nisi ad lacrymas. Hoc primum discimus, huic rei incumbimus usque ad mortem. Inventi plures sunt, qui non riserint: nemo, qui nunquam fleverit. Patientia itaque necessaria est, ut pectus muniatur, spiritum roboret, virtutes perficiat. Nemo potest cognoscere quantum valeat, nisi tribulationibus exerceatur. Non est sapiens, qui non est patiens.

2. Malè est homini, qui nunquam adversam fortunam expertus est. Aiunt medici nihil magis metuendum, quam nimis bonam habitudinem: sed & nautis nimia malacia suspecta est. Si te verberat & lacerat calamitas, non est fævitia, sed certamen. Nisi dimices, non vinces: nisi viceris, non triumphabis. Quod si oportuit Christum pati, & ita intrare in gloriam suam; tu præsumes alienæ felicitatis particeps fieri absque ulla tribulatione? Erras toto cœlo, si aliam tibi viam fingis, quam migres ad Cœlum. Virtutis sacramenta hæc sunt, bona facere, & mala pati. Indicia verò jam adeptæ patientiæ, sunt aliena mala æquanimiter ferre, inter flagella Dei non murmurare, eorum qui mala inferunt consortium non fugere, inter contumelias ab odio custodiri, divinæ voluntati quæcumque nos angunt adscribere, in malis filere, mala inferentes diligere: ob illatas injurias soli Deo conqueri, sequi illi paratum ad omnes ærumnas offerre cum gaudio & gratiarum actione. Denique verè patiens esse dignoscitur, qui erga proximi imperfectiones impatiens non est.

3. In honorum externalium jaetura magnum solarium

est, infidam eorum conditionem perpendere. Quicquid possides, quicquid amas, naturalem retinet fugacitatem: apud te est, tuum non est. Noli tibi imaginariæ stabilitatis desiderio illudere. Nihil firmum infirmo, nihil fragili æternum præter virtutem. Hoc unum contingit immortale mortalibus: cætera suam mortem secum ferrunt. Ergò quæcumque habes eo loco pone, ut magni sit inter te, & illa intervallum. Viro bono nihil eripitur, quia nihil possidet tanquam suum. Cur gemis amissu nummulo, elato filio, succensâ domo: perditâ autem modestiâ, verecundiâ, fortitudine non ploras? Atqui hæc bona tua sunt, & tui juris: illa nec bona, nec tua sunt. Si doles, cùm ea amittis, te dignum qui amitteres ostendis. Nihil te amisisse putares, si nihil inordinate diligeres. Externa sapientem non angunt, quia non tangunt.

4. Opus aliquod aggressurus omnia ejus adjuncta considera, plura invenies, quibus turbari mens tua poterit, si non fuerint prævisa. Puerum vocas? fieri potest ut præsto non sit, vel ut nihil agat ex animi tui sententia. Ad aliquem iturus es? fieri potest, ut inclusus sit, ut occludantur tibi fores, ut ille te negligat. Hæc prævide, & omnia secunda tibi accident. Ille me hodiè non admisit, cùm alios admitteret: sermonem meum aversatus est: me in imo collocavit: querelæ sunt nauseantis animi, in quas felices & delicati ac imprudentes incident. Non hæc observat qui his non afficitur, qui scit hæc omnia vitæ hujus tributa esse. Optimum autem est pati, quod emendare non potes. Si cuius malitiâ vel impudentiâ offenderis, cogita an fieri possit, ut nulli sint in mundo improbi & impudentes. Quod si hoc fieri nequit, quid accidit novi, si vir malus & impudens more suo malè agit? Vide ne potius tu arguendus sis, qui non prævideris hunc ita peccaturum. Semper sibi constitit mundus, vitia sunt ubi sunt homines.

5. Cùm aliquâ afficeris pœnâ, attende non quid patia-

ris, sed quid feceris. Si verum tibi dixeris, acrioribus flagellis te dignum fateberis. Deus est quo auctore cuncta proveniunt. Ipse te castigat, ut sanet, ut exerceat, ut induret, & sibi præparet. Futuris malis reservat eos, quibus indulgere videtur. Unde possum scire quantum animi tibi sit adversus paupertatem, si divitiis affluis? Unde dignoscam quantum habeas constantiae adversus ignominiam & odium populi, si inter plausus senescis? Audivi te cum alios in tribulationibus consolareris: opto te audire consolantem te ipsum, & tibi ipsi imperantem ne doleas. Si medico urenti, & membra secanti & gratias habes, & mercedem persolvis; cur Dei medicinæ non acquiescis? Amentia est putare damna, quæ sunt remedia. Si paupertas, si ægritudo, & cætera, quæ mala vocas, possent tecum verbis contendere, insultarent tibi, & dicerent; Quid mihi homo adversaris? Num aliquo bono meâ culpâ privaris? Prudentiâne an justitiâ, an fortitudine? An non licet tecum laeto animo esse? Bona erunt quæ mala putas, si super ea inconcussus eminueris. Magnum malum est malum ferre non posse.

6. In alienis casibus potes aliquando constantiam dissimulare, nunquam autem in propriis. Sit tibi fletus communis cum miseris, non fletus causa. Descende & inclina te afflictis, ut ipsos eregas. Nemo jacentem levabit, nisi se inflectat. Quia vero res omnes duplex manubrium habent, tolerabile unum, alterum intolerabile: si quis tibi injuriam fecerit, non eâ parte ipsum prehende, quâ facit injuriam: hæc est enim ansa, quâ ferri non potest. Sed cogita illum eodem Christi sanguine redemptum esse, ad eamdem gloriam vocatum: sic eum prehendes quâ parte tolerabilis est. Et quia amicitia valde exili voce prodita est ad liberas reprehensiones, veritatem ab adversario audire semper studeas. Hic perpetuò vigilans res tuas infensus explorati teque facilius mala tua quam ipsum fallent. Traducet te per vicos & plateas, animique tui morbum vel latentem vel neglectum ipse iratus com-

monstrabit. Ab hoc capere utilitatem satage, & consule saluti tuæ. Attentiūs seipsum circumspicit, qui paratum sibi novit censem, & adversarium.

7. Perseverantia virtutum omnium corona, & consummatio est. Inchoantibus præmium promittitur, sed datur perseverantibus. Ideo ante omnia hoc cura, ut constes tibi. Nihil tam utile est, quod in transitu prosit: Retrò relaberis, si ad ulteriora non contendis: & si incipis stare, descendis. Constitue quid velis, & in eo usque ad exitum persevera. Inconstantis animi est, novas quotidiè exercitationes assumere, novas subinde sibi quærere sedes. Non alibi sis oportet, sed alias. Planta quæ sæpius transfertur, tandem arescit: & remediorum crebra mutatio impedit sanitatem. Si Apostolus vas electionis non attendens quid ante fecisset, sed quid facere deberet, nequaquam se comprehendisse arbitrabatur: quid tibi faciendum erit, cui optabile foret, ut posses in fine tuo illius principio comparari? Ardor literarum nullâ ætate extinguitur, divitiarum amor insatiabilis est, expleri nescit bonorum cupido. Res finem habituræ sine fine quæruntur: divinam verò sapientiam si vel leviter degustaveris, continuò te saturum esse putabis. Aliter te ad perfectionem invitat qui dixit, *Estote perfecti, sicut Pater vester cœlestis perfectus est.* Hæc meta tibi proponitur, ut locum semper superesse scias incremento virtutis tuæ.

C A P. XXXI. *De Temperantia. Quantum illi conferat Verecundia. De Abstinentia & Castitate.*

1. **T**Emperantia voluptatibus imperat, quæ ex gustu & tactu percipiuntur: adscititas & superfluas odit & abigit, necessariis obsequitur, quantum recta ratio permittit. Ejus regula infallibilis est, solam necessitatem in his, quæ ad corpus spectant, pro mensura habere: nec unquam ad voluptates propter ipsas accedere. Hæc virtute efficitur, ne ex homine in jumentum labaris.

Ad eam plurimum confert Verecundia frænum pravorum motuum, bonæ indolis index, custos puritatis, testis innocentiae. Si mentem tuam illa possideat, docebit te omnem timere turpitudinem, ab omni actu illicito abstinerere, Dei præsentiam venerari, te ipsum ubique revereri, eamque semper diligere intelligentię pulchritudinem, quæ in operibus temperantiae maximè elucet. Porro tunc verecundum te esse dignosces, cum vel ad ipsum intemperantiae nomen expavesces; cum te parietes tui regent, non abscondent, quos plerique circumdatos sibi credunt, non ut tuius vivant, sed ut peccent occultius. Quid autem prodest recondere te, & oculos hominum auresque vitare? Tecum semper est Deus, qui ubique te videt: tecum conscientia, quæ ubique te accusat.

2. Usum cibi & potûs abstinentia, & sobrietas: quæ vero ad tactum pertinent, Castitas & Pudicitia moderantur. Et in usu quidem ciborum difficillimum est extra metas necessitatis non abripi. Venter præcepta non audit: poscit, appellat, & quotidianum tributum exigit. Sed quam parvo dimitti possit, quam modicâ stipe contentus sit, nemo recogitat. Cogimus vitiis servire natum, famemque & sitim, quæ naturalibus remediis facile sedari possunt, variis eduliis & potionibus irritamus. Castitas quoque ardua est inter tot libidinis incentiva; nisi ea compescat timor Dei, occasionum fuga, sensuum custodia, & maxima sui ipsius reverentia. Qui seipsum non veretur, nec alios vereri poterit. Vis castus esse? contine oculos, ne invitus ames, quæ incautè aspexisti. Quid fugacem & falsam creaturæ pulchritudinem admiraris? Exspecta paulisper, & jam non erit. Serenam frontem squalentes arabunt rugæ, mœsta teget nubes oculorum faces, dentium ebur scaber obducet situs. Fuge etiam pravorum consortium, omnem mollitem vita, carnem jejuniis doma, & durius tracta. Perit, qui nimium est amans sui sepulchri.

CAP. XXXII. *De Mansuetudine, & Clementia.*
Vtriusque officia, & præstantia.

1. **U**T iræ impetum mitiges, necessaria est mansuetudo, ne citra vel ultra recti limites hac in parte defleetas. Telum naturæ est ira. quo uti licet, cùm peccantes arguere & castigare ex officio teneris: cùm dictat prudentia tuam vel alienam injuriam debito modo repellendam esse, ne crescat ex impunitate reproborum licentia. Crudelis est tam qui nulli, quām qui omnibus ignoscit. Cùm verò justitia exigente puniendi sunt rei, mansuetudinis & clementiæ memor esto. Descende ad pœnas tanquam invitus, & talis esto erga peccantes, qualis exitit erga te Deus. Sicut ille sustinuit te, ut meliorem faceret: ita illos sustine ut corrigantur. Despicis Medicum, si desperas ægrotum. Tam facilis est ægri sanitas, quanta medici sapientia & benignitas. Vir mitis iracundiæ pelago velut scopulus supereminet: fluctusque impingentes dissolvit; nec pœna semper, sed sèpius pœnitentiâ contentus est. Clamat coacto cœtu humani generis Salvator mundi, Venite omnes & discite à me: non curare infirmos, non leprosos mundare, non cæcis lumen, aut mortuis vitam reddere. Sed quid? *Discite*, inquit, à me, quia mitis sum. Ad hoc redegissem videtur omnes thesauros sapientiæ & scientiæ sue, ut ab eo discamus mites esse. Tanta mansuetudinis præstantia est.

2. Ut mansuetudo iram, sic clementia punitionem moderatur. Illa ad omnes, hæc ad principes & superiores pertinet. Ejus enim munus est mitiorem pœnam, quām jura exigant, irrogare; non ex timore, lucro, amicitia, aliòve motivo, sed ex animi lenitate. Non opus est latera montium abscindere, & in arduo collis vertice arcæ construere: salvum principem in aperto clementia præstabit. Hæc est munimentum inexpugnabile, quæ tutum reddit imperium. Malus Princeps invisus est, quia timetur: & timeri vult, quia invisus est. Quem verò

metunt subditi, oderunt ; & quem quisque odit, perisse cupit. Vitæ Regum dominus est, quisquis suam contempsit. Frustrè se potentiam munit, qui septus suorum benevolentiam non est. Turpia sunt principi multa supplicia, sicut medico multa funera. Si Rex continet vim suam, si omnes injurias & offensiones supernè despicit ; si quodam alienæ iræ, neminem impendit suæ : tunc verè se Regem ostendit. Magni animi est placidum esse atque tranquillum.

CAP. XXXIII. *De Modestia. Munus duplex Studio-sitatis. Quæ regula in usu Eutrapelia servanda.*

1. **M**ODESTIA reliquas animi dotes mirabiliter exornat. Hæc forma honestatis est & frænum vitiorum. Quamvis sermone taceas, habitu & gestu te prodis. Argumentum virtutis ex minimis licet capere. Vultus, risus, incessus & flexus oculorum, sæpè hominem ostendunt, qualis sit. Sic vive, ut omnes cognoscant te ad consortium Angelorum pertinere. Serva decorum in motu omnium membrorum, in gestu, voce & aspectu; ne quid in his effeminatum & molle sit, ne quid rusticum aut durum. Vera modestia ab animo in corpus, ex interna morum gravitate in superficiem emanat, ut quasi supellecstile suam mens foris inspiciat. Vir modestus vivum Dei simulacrum est : nam solus ejus aspectus intuentes componit. At hoc quam bonum est, videri & prodesse ? Spectat quoque ad modestiam tui statûs conditionem in vestibus, supellectili, ornatu domus & multitudine servorum non excedere. Animi tui impedimenta hæc sunt, quibus non tu, sed quæ sunt extra te exornantur. Cur igitur gaudes malo tuo ? cur inania miraris & impedimentorum multitudine gloriaris ? Hanc servorum cohortem, quæ latus tuum cingit, rectè dixeris hostilem exercitum, à quo satis cavere non potes. Quid agas nosse volunt, non quid præcipias. Nihil humilius eorum ingressu, nihil progressu insolentius, nihil odiosius egressu.

2. Studiositatis

2. Studiositatis duo sunt munera ; alterum sciendi appetitu m , qui plerumque justo major esse solet , temperare & moderari : alterum, torporem excutere , animique industriam ad necessaria ediscenda excitare. Curiosum homini ingenium dedit natura , artisque suæ ac pluchritudinis conscientia nos operum suorum spectatores genuit , perditura fructum sui , si tam magna , tam clara , tam subtiliter ducta solitudini ostenderet. Sed abutimur naturæ bono , ea curiosè investigantes , quæ utilius ignorarentur. Non ille sapit , qui scit multa , sed qui sapit quod facit ad tem. Ea primùm discenda , quæ pertinent ad salutem : cætera quo minus legas non deterreo , dummodo quicquid legeris ad mores referas. Cave autem ne lectio multorum librorum habeat aliquid vagum & instabile. Certis ingeniosis immorari oportet & innutrir , si velis aliquid trahere , quod in animo fideliter se deat. Lectio varia delectat , certa prodest.

3. Danda est aliquandò remissio animo & assiduo labore quies intermissione ; non enim durabile est , quod caret alternâ requie. Legum conditores dies aliquot constituerunt , quibus ad hilaritatem publicè homines cogarentur , viresque reciperent paululum resoluti & remissi. Animi verò relaxationem plurimæ actiones constituunt. Inambulatio scilicet in loco ameno & aperto , ut cœlo libero attollat se mens & membra vegetentur : suburbana ac rusticana secessio procul ab urbium nidore & tumultu : aucupium & venatio , quæ statum tuum non dedeceant ; & piscatio quæ innocentior est : leta studia & mitiora , musicusque concentus & ludus aliquis honestus : joci demum innoxii & urbanitates , à quibus absit omnis injuria & indecentia. Sunt quidam nimium severi , osores hominum , suisque tenebris incubantes , à quibus hilaris sermo nunquam potest extorqueri. Alii jocis semper detiti , rebus seriis nunquam se populo subducunt. Miscenda autem ista & alternanda sunt , nam solitudo desiderium hominum faciet , frequentia tui , eritque altera alterius

C. Bona Opusc. Spirit.

B b

remedium. Odium item laboris sanabit remissio, tedium remissionis labor. Sunt & nonnulli, qui vires suas dispensare nescientes immoderatum in se imperium exercent. Modus illis deest. Nec intermittere studia sciunt, nec repetere. Cùm se ad laborem concitant, junguntur dies noctibus, nec desinunt, nisi deficiant. Rursus cùm se in lusus dimittunt, se ita resolvunt, ut ad priorem consuetudinem vix retrahi possint. Sic igitur dandum animo intervallum, ut remittatur, non resolvatur. Ad hoc necessaria est Eutrapelia, quæ certos fines præscribat, quos prætergredi nefas sit. Optima quæque mala fiunt, cùm quis modum excedit.

CAP. XXXIV. *De Humilitate. In quo consistat. De cognitione sui. Veri humilis characterismus.*

1. **A** Christo venit humilitas. Ipse eam verbo promulgavit, docuit exemplo. Hæc post virtutes Theologicas & intellectuales inter cæteras primatum habet, removet enim superbiam, quæ est origo omnium malorum. Hæc nos amabiles Deo reddit, quia cum humilibus sermocinatio ejus. Sine hac, quæ virtutum fundatum est, quicquid in spirituali ædificio superextruit nec solidum erit, nec stabile. Quamvis autem ipso nomine quidpiam vile & exiguum præ se ferre videatur, virtus tamen magnorum est, quoniam est virtus perfectorum, animumque erigit ad altiora. Illustria aggreditur sine tumoris periculo, ardua sine metu difficultatis, excelsa, strenua, magnanima, eodem semper tenore subsistens. Non consistit humilitas, ut vulgus putat, in mera sui despiciētia & abjectione, sed in ea moderata gloriæ & honoris appetitione, quæ & excessum devitet, & a defectu recedat. Appetit humilis gloriam tanquam stipendum virtutis, animo directè in actionem intento, non propter ostentationem, sed ob solam virtutem & quantum ipsa depositit. Illegitimus est omnis honor, quem virtus non parit. Quia vero humilis, qua pollet mentis perspicacia,

æquus sui æstimator est, omnem propè honorem merito
aversatur; tum quia novit quām sit exiguum, quod ipse
de suo confert ad opera virtutis: tum quia timet, ne ex
debiti honoris appetitu ad indebitum captandum prola-
batur. Tutius est aspernari honorem, quem qui recusat,
amplificat, qui spernit, auget.

2. Ideo humilis non es, quia te ipsum non cognoscis.
Nulla est regio tam remota, de qua facilius credas falsa
narranti. Quid est homo? Imbecille corpus & fragile,
suāpte naturā inerme, alienæ opis indigens & ad omnem
temporū contumeliam projectum. Massa luti, fœdum
animal, ad omnia mala proclive, adeò perverso &
pravato sensu, ut terrena cœlestibus, caduca æternis
præferat. *Vniverſa vanitas omnis homo vivens.* Nulli animali
vita fragilior, nulli rabies acrior, nulli confusior pavor,
nulli major libido. Unde igitur tibi superbia, miserabilis
creatura & omnium infelicissima? Attende miseriā
tuā, considera probra & dedecora tua, si qua in te su-
perest rationis scintilla. Tunc perfectè humilis eris, cùm
te ipsum nosse didiceris.

3. Verus humilis se prorsū despicit; neque humilis,
sed vilis vult reputari; honorem sibi debitum in Deum
refert & in omnibus de se diffidit: gaudet contemptu sui,
hoc solo superbus quod laudes spernit. Se ipsum conside-
rat juxta ea quae ex se habet, alios verò secundūm ea
quae habent ex Deo & sic aliis se conferens se omnibus
deteriorem arbitratur: hoc est enim ingenium humilita-
tis, propria mala aliorum bonis comparare, ex quo vel
quilibet perfectissimus potest sine mendacio se cæteris
imperfectiorem existimare. Ad hæc verus humilis omni
obedientiâ se subdit majori, propria desideria non perfici-
t, defectus suos libenter detegit, omnem injuriam pa-
tienter sustinet, abjectiora quæque cum gaudio amplecti-
tur, omnem fugit singularitatem, abstinet à multiloquio,
latere desiderat & nesciri: infra se omnia ponit; se infra
omnia, seque totum intra nihilum claudit. Verecundus

B b ij

est & circumspectus , non loquitur , nisi cogat necessitas ; idque modeste & sine risu , flere potius optans quam ridere . Cordis humilitatem corpore ostendit , defixis in terram oculis , gravi & modesto incessu , cernuo vultu , ad instar rei , qui jam debeat tremendo Dei judicio praesentari . Confcius flagitorum quæ commisit , incertusque de gratia & dubius de salute , non audet oculos in cœlum attollere , sed cum Publicano à longe stans ferventi oratione peccatorum veniam deprecatur : omnia denique opera sua veretur , omnia terræ bona despicit , omnem calcat mundi pompam : totum enim mundum nihil putat , qui se credit nihil esse .

CAP. XXXV. *De statu Perfectorum. Imago viri perfecti.*
Finis vita perfectæ unio cum Deo.

1. **P**erfectus ille dicitur , cui nihil deest . Quid autem potest illi deesse , qui purgatus à peccatis , emundatus à vitiis , ac virtutibus exornatus , Deo suo intime adhæret & unus cum eo efficitur spiritus in aeternum ? Hic est apex Christianæ perfectionis , hic finis ultimus , ad quem tendere debes . Cum enim quælibet res tunc perfecta censeatur , cum fini suo copulatur , finis autem tuus Deus sit ; tunc demum te perfici necesse est , cum perfecte Deo adhærens ad eum redis , à quo existis . Perfectus autem sine speciali Dei auxilio nemo est . Et quia pauci inter mortales ad singularem Dei illapsum recipiendum mentis apicem disponunt , ideo paucorum perfectio est . Paucos singula saecula protulerunt .

2. Virum perfectum illum esse dices , quem videris in territum periculis , intactum cupiditatibus , inter adversa felicem , in ignominia beatum , in mediis tempestatibus placidum , quicquid cæteri timent optantque ridentem , omnia tanquam minora transeuntem , nullo bono nisi suo nitentem , semper liberum , sibi semper constantem , sui semper similem , erectum , excelsum , vacuum sui & plenum Deo , cui bona sua nulla vis excutit , qui mala in bo-

num vertit, qui nullâ re frustratur, nullo læditur casu: qui pretia rebus non ex opinione, sed ex natura imponit: qui super omnia eminens toti mundo se infert & in omnes ejus actus contemplationem suam extendit, semper tranquillus & inconcussus: qui majore sui parte illic perpetuò commoratur, unde descendit. Sicut rādii solis, quamvis terram contingant, illic tamen sunt unde mittuntur; sic vir perfectus nobiscum quidem conversatur, sed optimâ sui parte abest & fini suo semper adhæret. Talis est animus ejus, qualis mundi status supra lunam: semper illic serenum est. Rerum defectus ignorat, varium animum nescit, omnia sæcula illi serviant, æqualiter tanquam sol universa perlustrat, atque omni multiplicitate rejecta in simplicissima unitate quiescit. Nihil optat, nihil querit extra se, non habens necesse longius arcessere felicitatem, quam corde inclusam gerit. Soli Deo operatur, soli Deo vivit, semper abire paratus. Hanc amissim adhibe vitæ tuæ & intelliges quām procul absis à perfectione.

3. Res ista major altiorque est, quam ut possis ad eam pertingere nisi ille te sursùm trahat, qui dixit, *Sine me nihil potestis facere*. Sed & præviæ dispositiones necessariæ sunt. Finis vitæ perfectæ intima cum Deo unio est: Et quia ille habitat lucem inaccessibilem, ad eum nunquam accedes, nisi tenebras creaturarum à te expellas. Non potest homo divinę consors naturæ fieri, nisi seipsum & omnia creata mente & affectu transcendat. Omnis vel minima cuicunque rei adhæsio, Echeneidi exiguo piscicu-lo similis est, qui si navim mordeat, eam fistit & detinet in medio cursu. Non aliter plerisque animabus contingit, quæ velut naves cœlestibus divitiis onustæ, beatæ unionis portum feliciter attingerent, nisi aliqua vitiosa affectione detinerentur. Deus unus & simplicissimus est, nunquam poterit anima unioni apta esse, nisi una & simplicissima efficiatur.

Finis Manudictionis ad Cælum.

B b iiij

